

新鄉縣續志卷三

邱墓志

萬物生於土而歸於土人生而至邱墓則亦與草木同腐耳然果有其不朽者如比干之墓特詔崇封柳季之壠嚴禁樵採非惟不與草木同腐且將與山川並壽焉故邱墓之志不惟其土惟其人也邦人君子尙各勉旃

蘧伯玉墓舊志在君子村茲考君子村東北三里馬連庄西有康熙四十一年泐碑文曰周衛大夫蘧伯玉墓巋然獨存相傳墓爲天塋則無可考

明貴戚錦衣衛指揮僉事張楫墓在皇親唐馬西南隅

明指揮使熊龍潭墓在店後營盤龍岡正西坡下

明指揮使熊占祥墓在店後營盤龍岡東南坡下

明百戶侯王幹墓在店後營西門外

明百戶侯王修身王修澤墓在店後營盤龍岡

明百戶侯王登第墓在店後營盤龍岡東

尙濱馨墓在城西三里尙氏祖塋有墓前碑石

于鑰墓在永城店西南隅明戊子貢生考授福建福州府通判

于芳墓在永城店東南隅

傅良臣墓在秦村營東去村里許

白受采墓在東張門東北郊

郭迓熙墓在東張門西北郊

崇明黃振鳳郭愚谷墓表歲丁亥五月既望家仲怡麓自共城
歸述萍水之交而津津於明經郭君諱培緒字讚若愚谷先生
冢嗣也繼出共陽居士並趙太君傳及誌述各一卷示余蓋欲

丐余文辭以表於墓也。迺憶己巳余以一行吏赴唐州，息轍於新鄉。時余同榜主政公省齋，偕余至其城之孟庄郭氏家，聖在焉。聯床剪燭，遂得借交。省齋胞兄愚谷先生閱三載，余以外憂去官，匿影里門。雲山迢遞，遂成闊絕。乙亥夏，余復補官邯鄲。主政公往返都門，至署齒頰必及於先生。逮主政公捐館，舍先生又以理學者碩志潔行高，恥屑屑與俗吏通酬答，稍閒暨壬午冬，先生猶子培遠公車過訪，爲之問訊。是時先生固康強無恙。乙酉七月之變，又何自而來也耶！嗚呼噫嘻，二十年中浮沉聚散，波逝雲飄，回思一二素心如先生昆季，又早委形而去，幽明歧路，百感縈懷，無蒙叟達生之識，而有子山哀逝之思。此余之所以爲先生放筆而痛哭也。嗚乎先生才豐而嗇於遇，德永而促於年，隱居教授，遂以終身。天道茫茫，不可問矣。然而粹精性

理之學窮探經史手自纂述以藏名山容城孫徵君先生卜居夏峯先生首師事焉與同門湯潛菴崔定齋耿逸菴朝夕講貫以五倫爲實地而體驗於服食器用之間徵君思賢詩有云駢臣有氣魄人以爲先生之實錄焉居父喪哀毀骨立時皆以貧不能塋爲先生憂先生曰喪葬稱家有無穀然舉行悉遵古禮會塋者靡不歎服事母蘇太君先意承志得厥歡心己未省齋釋褐移居新鄉蘇太君夏秋居孟庄冬春居新鄉兩地往返先生必親隨御車己巳省齋筮仕粵東蘇太君壽登大耋安居新鄉先生亦隨居新鄉朝夕不離左右有萊衣舞彩之風太君歿先生以數年病軀猶三日不食純孝之至真老而彌篤云先生絕意仕進啟迪後學多所成就且不樂標榜性喜方惡圓嘗謂子培緒曰余生平性太直多口過其弊有四一認真一好盡言

一輕信人一嫉惡過嚴又於捐館時教子於貧字中討生活卽此可以觀先生之所得矣先生諱迥熙字駉臣號愚谷世爲新鄉人居共城之孟庄故別號共陽居士十五入邑庠充康熙三十年歲貢候選司訓享壽七十有二

孟之哲墓在城南西抬頭北原

張燾孟公鑑遠墓誌銘公姓孟氏諱之哲字鑑遠癡齋其號也上世無稽始祖輔隸皖中鳳陽籍元至正癸巳從明高帝起兵濠郡累功封萬戶侯二世祖英充參侍舍人萬曆十一年特旨崇祀鳳邑鄉賢祠五世祖鎮巡視西屯病卒遂家焉高祖誠始以軍籍列膠庠曾祖見魯本生曾祖見楚庠生祖崇素庠生考世書庠生生公昆仲二人弟丕遠茂才居季公其長也生而穎異自髫鬣迄若成人儀狀方正不同流俗弱冠入邑庠科歲試

屢列前茅一時文名鵲起噪於大河南北每構一藝傳鈔者幾於洛陽紙貴世廟登極公卽於是科列賢書迭上春官不第乃猶手不停披丹黃鉛槧細枝蟲魚設帳傳經二十載以家貧丁繁舌耕難給下未謁選以知縣用是年充本省鄉試分校官一時有得人之慶十四年選得蜀南清溪令引見後調授粵東和平五月由原籍起程恰值淫雨連綿旱道則泥濘沒輪水路則檣傾楫摧滅頂裹足者數次兩月之久始抵粵垣由都迄茲迢迢萬里家園恒產悉充資斧和平又僻邑健訟號稱難治公擬臥理之甫數月仁聲四佈嘗銘座右云上有天中有法下有民不愛官不愛命不愛錢循吏傳中可置一席任內苞苴不行卽鼠肝蟲臂均無染指無如二豎肆虐不克鳴琴而理一家念餘口嗷嗷待哺公兩袖清風一塵不染乃請命上憲蒙給川資粵

中向無此例亦曠典也邑中萬姓攀轅卧轍膏肓難醫借冠無術乃送衣傘共誌遺愛召父杜母曷多讓焉當先未交篆時瓜代已屆承乏未來新舊交乘百弊叢生多以兼金相挽公悉却之各憲知公清廉自持札飭各邑劇金相贈少待時日千金不難立致公不肯信宿接浙以行浩然解組歸抵故園不數日即歸道山岌岌乎不克易簣正寢吁亦險矣配郭孺人邑中望族宗伯大參之裔邑庠增生奉宸公女一生無違夫子克盡婦道沒而耐葬公於西抬頭北原昭穴禮也公春秋五十有五卒孺人七十有六卒男二長淑孔壬午恩貢次降期翼孔孫七天柱廩生天馥癸卯舉人既爲之誌又繫以銘銘曰公之系出嶧陽公之居奠大梁時維癸卯龍翱翔丹桂高攀藉珪璋念載絳帳生春風今皇特簡任粵東數月謳歌四野同二豎肆虐返豫中

跨鶴緱山雲霧濛佳城深藏卅四冬孝孫持狀來乞銘恒嶽巍
巍峙翠屏衛水湯湯流長虹恒可爛兮衛可竭惟我銘兮不可
滅

衛大壯墓在縣北王門村東北

邑人游棣衛健齋墓誌銘公姓衛氏諱大壯字健齋康叔之裔
前明由山西遷韓城明季有中丞公景瑗巡按公楨固侍郎公
允文稱衛氏三君子十三世佑祥公遷新鄉與十四世諱霍皆
返葬於韓公祖妣劉太孺人妣申太孺人葬輝邑李固村公諱
霍公之季子也賦性英敏年十九縣試列首卷入庠旋食餼爲
文清刻不取媚於時由廩入貢肄業太學期滿試用委辦輝縣
賑務歷署唐縣通許商邱蘭陽羅山修武學篆所至頌聲藉藉
如掩埋唐縣餓孳八百餘口辦理睢州十三堡河工掌祿務總

局尤盡瘁匪躬有古名臣風任固始訓導十六載時嘉慶二年
教匪至光山之撥皮河固始官紳立軍務局推公首領其事團
練鄉勇而城賴以安賊平後壽春鎮營駐札固始二道河兵商
不睦公十七晝夜不離營伍安輯軍民而事乃息光州台牧廉
知公才值計典以卓異註冊固始本文獻之邦第國朝定鼎以
來中州無鼎甲自公久任固始及去任數年後祝公慶蕃吳公
其濬後先揚休廷對及第而公當日之振文教作士氣者概可
想矣去任之日不特及門餞送即農商婦孺咸追呼致流連慨
慕意次任內鄉教諭公年愈高德愈劭教弟子一本於循分孝
弟其德澤感人愈深是以碑碣匾額紛紛懸立書額有志在聖
賢者有功留學校者有酈陽師保者賢勞碑記功碑建於明倫
堂左壁迨去內鄉赴歸德教授任數年後內鄉及門猶傳語歸

德欲爲公立去思碑公早年家素貧嘉慶二十年後生理虧折積欠紛繁公取自固始以來宦囊金約半萬掃數歸償無吝色任歸德公屢乞休上憲屢勸留然憲眷深而勞公者亦倍深差委之繁踰於常格如會訊會勘以及重修名宦祠創建文昌宮創建張家飯棚橋公勤敏猶昔一如在固始內鄉監修聖廟城工之勞勤也乙未春詳請休致家居二載疾革生於乾隆二十一年十二月初二日亥時卒於道光十七年十一月初十日亥時年八十有一銘曰太行岌岌衛水洋洋山川鍾毓因人而彰懿行淑德兩垂其芳儒官三郡織女七襄聲施閭里蹟著家邦警效忽違音容渺茫佳城新奠福蔭休祥更裕後昆旣表瀧岡李夔墓在秦村營東北古漢堤傍久湮沒鄉人掘土出墓誌一石生員傅際昌見之驚曰此吾鄉李公歷山墓也令埋之爲立碑碣

於其上

王揆一墓在孟家營南

松滋熊奉章王忠烈公墓表粵逆倡亂蹂躪徧東南三河之役
爲東征一大蹉跌而前署道州王公揆一適與於難天子悼憫
卹賞有加追贈同知銜予世職謚忠烈并崇祀五忠祠嗚呼以
縣宰而膺異數稽諸往牒未之有也按公諱揆一字聖田號槐
軒性極明敏弱歲冠童子軍道光乙未舉經魁甲辰大挑一等
簽分河東委中牟工錢庫事務公綜理微密一無所私丁未成
進士發湖南卽用湘撫駱文忠公見而異之未幾檄署道州事
山中劇盜甚熾穴深箐林以居夜輒糾衆劫富室老稚迫以金
贖不則磔之公親備糒往偵生擒渠魁屠其巢境內少安於是
宏治士氓納之義軌不期月吏治蒸蒸大府採其政聲題授湘

鄉縣知縣道之紳民聞之重趼長沙泣訴留公得請乃已咸豐辛亥賊入楚境逼近道州提督余某懼啟西門逸去公巷戰終日左臂中傷劇甚乃具朝服北向拜曰此城卽我塚也言訖投河死救者援出氣未絕擁至永州府復甦欽差賽公見傷瘕奏白之駱文忠偉公籌策咨商官文端公胡文忠公會奏留營公疊攫家難屢乞旋里旣知義不可辭乃墨經從戎先是常德澧州崇陽通城九江等處皆爲賊有公贊前軍次第規復遂復原職然念道州不守每恣心疾歲戊午師次三河賊悉來犯我軍失利遂與浙藩李忠武公奮身以殉嗚呼公至是得死所矣公生於嘉慶十七年十月二十一日卒於咸豐八年十月初九日年四十有七配路氏誥封宜人有側室趙氏無出例不合葬而錫侯昆仲賴氏撫養以至成人從權合葬本村五龍口先塋子

二長錫侯庚午經魁世襲雲騎尉庚辰大挑二等選授西平縣
教諭學憲朱林兩次保薦特授廣西天河縣知縣調署容縣事
次安侯附貢生孫三長毓福監生次毓祺試用未入流指省直
隸三毓祿幼讀曾孫二長寶熙業儒次寶憲尙幼公資秉孝友
室無閒言處鄉里閒熙盜和柔與物無競一涉非義則懷不可
犯常云吾儕幸廁科名當勉爲一方矜式若必列仕版而後樹
立世道人心責將誰任奉章權篆此邦實深景仰辛卯其嗣君
以誌墓請特撮其大者紀之銘曰始爲良吏卒爲忠臣毅然守
正殺身成仁道州作牧吏肅民康忽遭烽火城亡與亡洎奉赦
書待罪戎幄猛氣咆哮誓殲元惡三河同仇死者良多謚以忠
烈氣壯山河胡豐於才胡儉於遇淑孳利貞自天錫祚太山峩
峩衛水彌彌再表幽阡翼爾綿爾

劉大信墓在邑南張灣

邑人郭寶樹劉中孚墓表易云積善餘慶書云作善降祥自古
福緣善慶未有積善而不獲福者也余童蒙時聞張灣劉姓
爲吾邑望族子孫蕃衍後先濟美竹林棠棣間經文緯武掇芹
芬折桂杏者輝映一堂尤堪艷羨者其仲嗣湯盤先生與弟健
菴先生同榜捷武魁先後成進士直禁廷同授御前侍衛湯盤
先生旋任粵西左江南甯都戎一門之內子盡克家孫皆繩武
紫電青霜蛟騰鳳起議者知其陰德之報爾時孩提無知未悉
其詳道光丁未隨侍先方伯公宦遊燕都始得識健菴先生於
京師朝夕往還因備悉其家世顛末然後知其厥後之克昌者
皆由封翁暨淑配太恭人之德也公諱大信字中孚幼讀詩書
長而務農服田力穡勤儉無廢事初年田僅百畝晚年漸增至

五百餘畝性至孝父患癰公侍奉湯藥必親嘗衣不解帶者數月嘉慶十八年教匪竄擾鄉人紛紛逃匿公戀守病翁弗忍去賊亦卒未擾及足徵誠孝之感公秉性忠愨處事公平與肩挑貿易弗估便宜嘗購買糞土價雖先經議定後覺價值過廉必斤斤然持錢補給以鄉人之積資不易也彼數年內歲多歉公田內常收獲豐稔地脈滋潤鄰里皆以爲仁厚之報課子孫以嚴文武兼進因材施教有丈夫子四長永奇入武庠次永新中乙未武闈亞元丙申進士授藍翎侍衛三永乾與次兄同榜武魁庚子捷南宮欽點花翎侍衛四永熙邑庠文生公兄弟十一人公居次因兄乏子以長男永奇三子永乾承嗣焉公獨力創建宗祠心力告瘁後因積勞棄世太恭人趙氏係處士諱軫公女幼嫻閨訓生性敦厚事翁姑以孝處妯娌以和恕以待人寬以

馭下年十八歸封翁克勤克儉宜室宜家老幼無閒言建造房屋百楹經營落成皆太恭人親司炊爨族黨有疾病者必親往存恤鄰里有匱乏者必竭力資助以故遐邇頌德者不輟於口教子孫慈而嚴嘗戒之曰勤耕讀即是正途一人是非之地則辱及先人矣湯盤先生赴任粵西時太恭人諄諄勗之曰途路宜慎事君宜忠能爲忠臣即是孝子去則去矣勿以我爲念也道光乙未健菴先生元配去世遺一子萬杰甫週歲戊戌繼配又亡子萬鵬生僅三月太恭人顧復提撕覓乳撫養力盡筋疲人所難堪而太恭人不計也道光戊申健菴先生卒於家咸豐甲寅湯盤先生又棄世太恭人泣謂諸孫曰兩子繼逝足徵我德之薄汝曹以刻苦自勵努力上進以繼家聲諸孫亦皆英偉俊爽克紹箕裘厥後諸孫先後入泮登科簪笏滿床芝蘭繞砌

太恭人可謂苦盡甘來圓滿如意矣宜其壽享百齡堂開五世
鳳詔鸞章珠聯璧合洵屬熙朝人瑞不獨爲吾邑生色也所謂
積善餘慶作善降祥者又豈有毫髮之爽哉光緒十年歲甲申
其孫青宇孝廉欲表其墓丐序於余余自愧不文兼以筆墨久
疎語無倫次而辭不獲已因不揣固陋綜其梗概而爲之表

杜來咨墓在小冀鎮

邑人張時中杜成之墓誌銘先生善士也世居新邑西南之小
冀社姓杜氏諱來咨字成之代有積德至先生而益彰布政司
經歷和庵翁無子素愛先生先生行四郭太恭人所出承嗣之
時年方十有二歲和庵翁歿後節孝蘇太孺人在堂先生之庶
母也其事之無異本生極溫清於生前時屢承歡之意請旌表
於歿後益見追慕之誠奉所嗣庶母若晨殆可謂生死無憾歟

其難弟任榮澤縣訓導諱福曾其猶子聯捷進士福建南平縣知縣加知府銜諱世銘皆賴先生教誨而成先生之於弟姪子孫愛之甚深而課之必嚴門內有師範焉生平酷嗜經史雅尚實行遊泮後博羣書懷大畧嘗謂爲士者通經致用務以實學濟世文辭其餘事耳一時之知先生者咸以大器目之奈命奇莫遇屢躓棘闈遂慨然曰士君子不獲大用卽振鐸一區終愈無補於世乃筮仕鄆陵任儒學訓導是時先生年近五旬迎養郭太恭人於署耆艾孺慕有萊子風率諸生以明倫飭紀諄諄循循同寅具欽儀型矧鄆邑之庶士乎越四年儒風丕振稱先生者僉曰此吾邑之真訓導也小用小效斯亦足窺其一斑矣以丁郝太恭人艱遂旋里周急恤貧疏財仗義每值歲歉貧乏請貸者甚衆先生輒逾時焚券不冀其還故鄉里嘖嘖稱厚而

先生則自視歛然終身以謙謹自持以端方自矢年七十有餘
卽與卑幼相接而抑然下肅然敬雖老病在身疲困喘息其行
立起居無稍不正非學深養邃烏能若是哉德行如先生洵足
著當時傳後世焉生女四子三長太學生世謙四十四歲卒次
世莊十九歲卒俱元配宋宜人出季世立方十二歲周宜人出
孫一按察司照磨澤常曾孫二發義發志俱幼先生生於嘉慶
六年四月二十四日午時卒於光緒元年二月初二日戌時享
壽七十五歲其承重孫澤常既卜塋期將開宋宜人王宜人壙
合厝先塋囑余誌墓余忝屬姻戚知先生甚悉爰爲誌而并勒
以銘銘曰嚴氣正性履潔懷貞睦嫻任恤孝友克稱司鐸一隅
羣瞻儀型不惟提命動物以誠春暖惟和秋肅惟清清和并擬
先生之風

郭宗棻墓在魯堡

邑人衛榮光郭芳園墓誌銘歲壬申公於解組之暇杯酒以宴
戚里光以與譙集聆其言觀其貌耆年碩德續如藹如非學養
有素何以至此光旋奉命江左不獲時親道範丁丑春復丁艱
旋里而公已赴召玉樓哲人其萎能弗悵然其嗣瑞卿出事寔
一冊請曰先大人之塋也尙未銘願賜珠璣以光泉壤光不敢
辭遂握筆以道其梗概公諱宗棻字芳園行二又行八新鄉人
也其始祖五老公於元季攜子遷茲土父子躬耕以忠厚正直
垂訓三世永堅爲陵川縣尹遂於此發祥焉至十一世刑部主
事諱遇熙累代簪纓不絕遇熙子諱培墉以廬墓旌表孝子復
舉孝廉方正又授南陽縣教諭公曾祖也永城縣教諭諱兩銘
公祖也日鈔先儒格言語錄八十餘條猶不倦父諱澄增廣生

以公貴封奉直大夫公兄弟三長兄宗模辛酉科舉人次兄宗懋公居三少失怙四歲過繼於伯父唐縣司訓小癡公性聰敏讀書目十行下少若成人絕無童稚習小癡公豪邁自喜淡於仕進授以小學讀之曰顯揚不在功名吾家祀名宦者六人祀鄉賢者九人貴力行爲後世法斯已矣故公歲十八未嘗誦時藝繼父歿於唐縣宦囊羞澁難以言旋公哀毀之餘羅掘維艱兼之道路阻長河冰夜渡皆公獨力扶持自此家愈貧數有侮者公乃憤然習帖括初應小試卽補博士弟子員一戰復捷賢書嘗有句云一日藍袍纔換紫千入白眼盡回青其勇於立志類如此初入會闈薦而未售公亦以義命自安此時小癡公已有二子公復歸宗以奉養太宜人乙未大挑一等以知縣用公以家貧親老改教職選羅山甫蒞任卽首倡修文廟課士勤敏

寒暑無間遭太宜人之喪哀毀骨立扶柩旋里營葬悉遵文公
家禮服闋復選陝州學正因守城出力上憲欲保知縣公曾以
知縣改教何能復官是因力辭乃知公志在昌明後學後加內
閣中書銜推陞彰德府教授遇覃恩請加五品封公嘗以嗣續
維艱納筵室周氏生子未十歲而傷未幾周氏亦歿公痛惜之
乃曰明德者其後乃有達人子亦不可強求遂不復納妾矣公
素健尤善調養正襟默坐言笑不苟與人居有一言涉非義即
引去一事近不仁即引咎當童子時習彈弓偶彈傷一雀遂悔
惜不已從此終身不學武平生以祠堂墳墓爲念故修廢墜刻
族譜不吝貲財凡事好爲其難者大者兄益夫早歿公以已長
子過嗣又爲其兄娶配以繼大宗公元配李宜人荆釵布裙井
臼自操年三十四歲卒生女一適監生趙公念祖繼配劉宜人

江南寶山縣丞劉公大章女家素豐初適公門見公高義即改
華爲樸親族賢之年三十四歲卒再繼配李宜人庠生李公文
藻胞妹勤紡織工鍼帶步履安閒有儒家風年三十一歲卒生
女一適壬戌科舉人劉公占卿公子二長龍光監生承嗣於公
之兒次雲光亦貢成均皆今之王宜人所生也公生於嘉慶二
年三月初七日卒於光緒二年十二月二十八日享壽八十歲
與李劉李三宜人卜吉合葬祖塋爰爲之誌更勒以銘銘曰王
潤珠光公德孔臧桂茁蘭芳哲裔孔昌綿綿世澤共汪洋靄靄
淑範相頡頏太峯鬱秀而茫茫衛水清澈而湯湯西岡矗矗其
如堂應知其發有長祥我欲大聲問蒼黃何年磅礴結琳瑯
林先生墓在西門外獨眼橋北道光二年正月知縣熊如洵暨邑
紳衛自權郭惠波等爲立石墓側名清字文波閩人

劉永新墓在張灣

邑人王安禱昭武都尉劉公墓表予於劉遊戎公爲世代姻戚
其建牙南寧時先大伯祖占鰲公從戎幕時粵逆洪秀全倡亂
屢犯南寧公修戰守無虛日後先大伯祖卒於軍先堂伯雅甫
公往收遺骸又累從公拒賊一日賊大舉犯潯州公偕大軍扼
江而陣賊艘乘大霧寅夜暗渡襲我軍及其未濟也我軍急擊
之礮聲震天地賊殊死戰不稍卻黎明賊艘麇集拚死登岸銳
不可當公隨諸軍大呼陷陣先堂伯從之短兵相接戰移時賊
大披靡斃賊及蹙江死者無算賊乃渡江遁先堂伯屢述此役
余方童年每聽至戰酣處不覺色飛眉舞迄今猶歷歷如在目
前願余生也晚於公之勲勩不可得而詳公冢嗣來東武孝廉
已去世其仲子寶泉茂才當公捐館時亦尙在童穉不克備記

公繼配竇恭人以淑德登上壽曾從公任所稍知其畧今竇恭人卒祔塋公墓又三年於茲矣竇泉以表墓之文囑余謹卽所聞於竇恭人者次其涯畧俾後之人有所考云公姓劉氏諱永新字湯盤號銘吾衛輝府新鄉縣人世有隱德祖天祥父大信俱以公貴誥授昭武都尉祖妣氏楊氏趙俱封贈恭人公體貌魁梧修八尺有餘膂力逾恒輩幼讀書比長厭棗佔畢之學乃練習武備馳驟騎挽強弩發必命中舉鉅刀而舞揮霍瀏亮雖百餘觔如無物旣冠入武庠道光乙未偕弟健菴公同試武闈公中亞元弟健菴亦登魁選丙申公聯捷進士欽點藍翎侍衛弟健菴庚子成進士欽點花翎侍衛兄弟競爽翱翔禁衛時論榮之癸卯選授廣西左江鎮標中營守備逾年署南寧城守營都司又署鎮標左營都司時洪逆披猖竄鎮安公奉天府檄帶

兵助勦獲賊渠張天飛等旋胤隆安公星夜赴援又獲賊黨麥
得科等蒙保奏以都司儘先補用咸豐辛亥補授檀巖營都司
賊魁顏大頭擾新寧公進至大塘連獲勝仗壬子奉委馳赴廣
東之新界坪會勦賊匪又擒獲匪首蘇凝三等遂赴援桂林艇
匪擾潯州又會攻勦股匪悉平先堂伯所述蓋即此役蒙保奉
賞戴花翎旋署鎮標中營遊擊張國樑軍門者中興名將也原
名家祥其未反正時嘗從賊累犯橫州賊用其計官軍輒不支
公數數與之對陣每不分勝負然國樑知公善撫士卒得軍心
服公忠勇且有偉畧久之遂因公投誠爲國得人用消反側厥
功尤鉅是時羣匪勾結盜賊縱橫潘啟泰熊七常要士等先後
煽亂攔入郡城幾釀大禍皆賴公捍禦調停獲保無虞各上憲
雅器重公方將大用而公以積勞成疾竟患嘔血寢尋溘逝嗚

呼惜哉公生於嘉慶二十三年四月二十三日午時卒於咸豐四年九月初七日午時公元配張恭人名門淑媛中年遽逝繼配竇恭人幼聰慧相者云掌中布三台星卜其必貴既長爲公繼室在任所布衣疏食不廢女紅公卒後料理後事井井有條公生男子二長萬春卽來東公同治癸亥武舉張恭人出次萬疇卽竇泉邑庠生竇恭人出孫男二長鐸邑庠武生長鈞業儒曾孫男三宜浚宜浴宜澂銘曰古陽之堤迤邐屈伸地氣磅礴實產偉人維此偉人孔武有搢奮迹材官鄉會聯捷式登上選入侍禁闈洪逆倡亂潢池弄兵公建高牙出守南寧累戰克捷忠勇奮武薦陟都戎遂攝遊府式將大用遽爾棄絕一軍皆哭悲壯嗚咽千載英風此石不滅

劉永乾墓在張灣

邑人朱希濂劉健菴墓表公諱永乾字健菴行三封翁制宜公之嗣子也束髮受書弱冠後慷慨投筆由武庠生應道光乙未恩科鄉試登魁選銘吾公亦中亞元兄弟同榜時豔稱焉明年公車北上銘吾公獲售欽點藍翎侍衛公賦歸蓋亦時命未至非戰之罪及道光庚子公登進士欽點花翎侍衛遂留都其在朝也鷄鳴入直終日危坐午門外事君盡禮公實有焉退食之餘輒謂家人曰使老母在此其融洩當更何如覃恩之年父制宜公生父中孚公及伯兄世珍公並錫封典守禁九載將外補遂乞假省親旋里後戀戀慈闈恭兄友弟藹如也是歲紹文公應童子試公屬望蒸切赴郡送之榜末發公乘欸段歸遂感寒疾病臥中猶諄諄以季弟之功名爲念及報捷音而公已捐館矣公生於嘉慶十七年卒於道光二十八年時年三十七歲也

初爲諸生時恂恂如儒者而挽強命中百不失一射以觀德非志正體直烏能若是通籍後與僚友交信義敦篤詞院諸名公咸器重焉蓋其持己也恭而出之以謙其接人也和而守之以正卽如都城向無中州武會館公首倡其議及工竣而公不列名亦足見德行之一斑也使天假之年則建節請纓必與汾陽武穆相伯仲惜乎驥足未展而齎志以歿也德配史恭人享年二十九歲宋恭人享年二十三歲張恭人享壽七十二歲皆幽閒貞靜爲公好逑但丙言不出故不述哲嗣特甫公史恭人出入武庠雲程公宋恭人出亦操舉業入邑庠皆綽有父風能世其家猶足見公遺範焉余生也晚每以不及同時爲恨然私淑自艾心嚮往之故謹敘公生平以俟修史者之採耳爰爲之銘曰仰止高山茲念茲釋聞風興起而况親炙豪傑胸襟聖賢情

性吁嗟長才不幸短命惟仁稱壽惟直長生卓彼顏冉豈論年
庚身騎箕尾氣貫斗牛明星煇煇公自千秋

郭祥瑞墓在縣城西北五里堦堆南

鄭州李煥揚郭玉六墓誌銘公諱祥瑞字玉六號毓麓世爲河
南新鄉人幼穎異嗜讀書年十六爲諸生家計窘乏度日維艱
而攻苦力學雖盛暑嚴寒不少輟以道光癸卯優貢中式甲辰
順天鄉試丁未成進士官戶曹夙夜趨公矢勤矢慎咸豐癸卯
補軍機章京丙辰充會試同考官庚申補監察御史旋充會試
同考官秋七月奉旨幫辦五城團防事宜當是時聖駕狩木蘭
夷人逼近京師厥氛甚惡士大夫出都者載相擊公整理國防
晝夜巡緝矢志不移以此特受主知冬并給事中辛酉充順天
鄉試同考官公三與分校咸稱得人顯廟嘗以鑒別允當嘉之

在諫垣前後凡四年多所陳奏李文清公在樞廷時嘗謂人曰
郭君好惡極正可謂不負臺諫之任矣同治壬戌奉命典試粵
東所取多知名士癸亥升授廣東督糧道時道路阻梗航海赴
任因庫款支絀捐廉助軍特蒙溫旨旋升按察使司按察使撫
軍某治尙嚴猛公務求詳慎全活甚衆一切清理積牘平反冤
獄往往與撫軍力爭不少遊時西江客匪倡亂撫軍將提兵往
勦公曰客民俱有天良非真有謀逆之心不過一時憤激所致
可以言語撫也撫軍即以屬公公即乘輕騎從數人直抵匪中
諭以大義客民初則涕泣求撫旋復噪而圍之蓋欲有所邀也
公曰爾等造亂撫軍即欲提兵勦爾余爲爾乞命冀以誠信相
開以施格外之仁爾乃負固若此此余料事不審余亦不復歸
矣因拔佩刀欲自刎客民相顧驚駭登時就撫既歸同僚莫不

欵服以汾陽單騎見虜況之旋署布政使事客匪又爲反覆乃同撫軍督師進勦殲其渠魁餘置弗問地方以平奏入奉旨賞戴花翎署藩篆一年獎廉明斥貪汙一切陋規革除殆盡軍糈緊急欵項不支多方維持心力並瘁嗣因動用庫欵與例不符部議降四級調用遂以罷歸嗚呼方公之初任粵東也上以公辦事認真諭令趕緊到任公受三朝知遇感激殊深既蒞任精白自矢務期盡力盡心以仰酬主眷乃未竟所施遽爾鐫級公之事無可愧而公之志實有未盡行者矣公生平痛早失怙恃待弟光祿寺署正維屏友愛倍至既歸里一切家務悉以委之惟以保衛鄉里賙濟貧乏誘掖後進爲已事以同治十二年四月十四日薨於家壽六十有二總計公之生平爲學則盡其才居官則盡其職待人則盡其厚嘗顏其齋曰求諸已嗚呼觀此

亦可以知公矣。曾祖諱福，考諱殿元，三世皆以公貴。誥贈資政大夫，配龔氏，誥封夫人。子三：長寶樹，咸豐辛酉拔貢，四品銜，兵部車駕司郎中；次寶樾，次寶棻，俱幼女。一幼未字。以某年月日，塋於新鄉城北五里堦堆南坡先塋之次。銘曰：宣聖有言，君子求己，公則佩之，終身是以成。其學文名蔚起，以事其君，誠通黼扆，海國搆禍，妖氛尺咫，凡在都者，紛紛逃徙，公領團防，屹如山峙。帝曰：壯哉！朕寶嘉爾，潢池弄兵，皆吾赤子，遽克以威，嗚呼！殘矣！公布其誠，迷途爲指，莠去良安，人歌孔邇。遂初既賦，惠我梓里，義行所存，罔不疊疊，或出或處，旋吉視履，哲人云亡，厥德一堪，紀行山之陽，大河之侯，馬鬣峯高，疇不仰止。

趙希聖墓在永安村

邑人王安瀾趙彥士墓表人之克昌厥後其性情心術必有卓

卓可傳之處如鄉耆彥士君是可述已君姓趙諱希聖原諱起盛彥士其字也世居新鄉永安村曾祖泗景字宗魯妣氏杜塋西郊祖成功字燦然國學生妣氏孟實始塋於此父檀字香枝國學生妣氏李生子二君其長也幼失恃繼妣李撫育之君儻有胆畧幼讀輒成誦甫成童應童子試未幾又失怙以家政待理遂廢讀業懋遷累獲廡餘十數年家貲稱素封事繼妣無閒言性好施與戚黨有急輒攸助之尤倉卒善應變喜脫人於難嘉慶十八年教匪陷滑縣大軍圍勦車馬夫役抵軍者多被扣留刁難訛索莫敢誰何被留者皆訴於君君慷慨至軍謁楊帥備陳縹役苦難狀被留者皆放還又獲嘉良家某某二人被教匪裹勒克復滑縣後官軍搜獲置新鄉獄中誣服賊黨行處決矣其家中遣人具保邑令不許適君以公事謁令見具保者

係循循儒生心知其寃乃詭言於令曰某某與予素識礪係良民敢以身保其無他二人卒得脫其濟人之急類如此君以幼孤不克卒讀常引爲憾事見儒士必敬禮有加配張氏生一子即吾太夫子玉璽國學生殷勤課讀績學未售孫三長爲吾夫子霜田邑增生次薰南國學生三度之中辛卯科副貢曾孫八元孫八振振繩繩然日以昌大或蜚聲庠序或名登賢書其後人克光前烈皆君之陰德培植有以致之也瀾從學於霜田夫子且託先世葭莩聞君之遺事最悉因述其涯畧揭之貞珉以俟訪求遺獻者有所考云

衛榮光墓在輝邑李固村東北

滎陽孫欽昂衛中丞墓誌銘大河之朔有其初稱爲佳士其後轟轟烈烈稱爲一代偉人雖人琴旣往而不次之功業猶足動

九重軫悼永所部哀思於無窮如靜瀾衛公是可惜也按狀公諱榮光字靜瀾河南新鄉縣人中道光丙午科舉人咸豐壬子科進士改庶吉士散館授職編修是時天下多事髮逆披猖湖北中丞胡文忠公督師勦賊延訪賢才聞公名同戶曹閻丹初調往至則論餉談兵悉中窾要文忠公嘗倚之如左右手復令回豫募成馬隊隨同多將軍轉戰安徽克復潛山太湖等處往往出奇制勝而自安簡默未嘗言功迨江漢肅清文忠公歿公回京供職遞補侍讀侍講學士同治癸亥出爲山東濟東泰武臨道人以內忽外且降而爲道恐非所願公受任怡然絕無鬱鬱之色乙丑捻匪東窺時閩戶曹已爲中丞委辦河防賊乘夜潛渡公偵知親然大礮轟擊數次賊始散退丁卯捻匪又復東窺中丞丁文誠公帶兵出境委辦省防兵單餉絀公招集民團

修築石圍復率將士晝夜巡邏賊見守備嚴不敢犯旋以父憂去官服闋補授江安糧道未幾擢安徽按察使又未幾擢浙江布政使光緒戊寅特簡巡撫湖南一時貪墨之吏多聞風解組未抵任丁母憂回籍服闋遷山西巡撫大慶之後一意拊循裁局員節糜費歲以巨萬計辛巳調撫江蘇吳俗風尚浮華公以身教黜奢崇儉爲士民先乙酉奉旨渡臺查辦事件往返百餘日歷重洋風濤之險積勞成疾已在此行矣丙戌調巡撫浙江公念浙江爲昔舊治深恐初終易轍致拂輿情故雖疲精耗神不敢言退比承命再撫山西始獲請假省墓故鄉而積年舊痼一朝感發遂不起以光緒十六年正月二十三日寅時卒距生於道光四年七月二十一日辰時春秋六十有七以湖北軍功賞戴花翎以協辦陝甘餉賞加頭品頂戴授光祿大夫公平生

未嘗以私干人亦不喜人以私干己方撫浙時某某大紳以火
災堪虞公請城內火藥局移置城外公曰在慎選局員耳倘移
城外萬一有警不誠藉寇兵而齊盜糧耶聞者莫不歎服其他
謀慮深遠不輕以詞色假人多類此初公受業於李文清公文
清公嘗語人曰河朔弟子惟靜瀾最靜且留心經世之學誠佳
士也公由是知名爰爲之銘其銘曰衛水洋洋土龍四映靜者
當之心如懸鏡文學侍從佳士遙聞楚營調往卓著功勳廉明
公正五省迴翔鞠躬盡瘁召遣巫陽氣作星辰名留史傳流芳
奕世臣工用勸

田松林墓在縣東南馬家營南

奉新許振禕田秀嶺封翁墓表公姓田氏諱松林字秀嶺世居
新鄉縣城內西街曾祖胡祖發旺父均本生父培世有隱德至

公而始著以子芸生貴封文林郎公孝友勤儉樂善不倦尤好
陰隲書嘗手鈔數百紙遍送村塾慎言笑寡交游跬步不苟雖
作吏數十年未嘗受孽錢一文而子姪讀書費率典質以償不
稍惜歷任邑宰皆敬重之獨衙蠹輩咸目以爲迂迨其子香圃
生舉孝廉始帖然而服積善餘慶之說固自不誣相感而化者
且數十家元配氏郭蚤逝無出繼配氏王封孺人幼嫻姆訓持
家嚴正有大體佐公四十年必敬必戒賢淑稱戚黨閒先公二
年卒是時香圃生方三講山陽篤志前修亟思愛日方長叨祿
爲養詎料天奪善人遽使之椿萱迭萎耶吁可哀矣然有子克
家亦足以光泉壤也余曰望之公卒於光緒二十一年二月初
十日春秋六十有四三月十九日未時合基於馬家營之南新
阡偪近祖塋從先志也子六長冀生從九品次芸生壬午科舉

人庚寅挑取國史館臚錄議敘知縣次芳生芝生苞生蔭生均業儒芝生先逝孫男九均幼讀既葬公之次年余由河東奉命撫粵香圃生來徵文於余以余之素稔公德也爰系之銘曰衛水湯湯出自太行實毓耆碩令聞令望鬱久必發文星光芒宅茲佳兆俾熾而昌

王錫侯墓在縣南孟家營南原

邑人田芸生子蕃王公墓誌銘余權篆巴東之次年甲辰夏契友王君子蕃以選授廣西天河令捧檄過鄂不獲晤而以書抵余內有此行豈爲官聊以報國恩繼先志耳患難非所計性命非所惜云云余讀而壯之時廣西匪燄正熾天河已在淪陷中嗣聞到省委署客縣意以爲或尙可治及冬月余調辦漢陽兵工廠事而君以書來歷言其地之苦治之難舊疾作將告歸已

迭請開缺矣余以爲大府知君必慰留也本年春忽聞某公怒其辭之堅而以爲迂執竟鑄級然得賦遂初亦君之所樂猶冀歸而過此作數日談乃直至夏秋之交惡耗倏至君猶子毓祺奉君柩歸至家嗚呼績學數十年遊宦七千里治事僅數月素志未酌而盡瘁以歿魂兮歸來能勿傷哉然立心制行始終一致所謂報國恩繼先志患難不計性命不惜者至此而可告無愧矣余方綜其生平書之輓聯藉抒悲感君弟君平以歸窀有日寄狀來請爲銘殆以余知君之深乎君諱錫侯號葆源子蕃其字也世籍新鄉父忠烈公揆一以名進士仕湘中君以是時生幼而穎異過目輒能記誦而至性尤篤咸豐間忠烈公從李忠武殉難三河君年方十二聞訃驚痛幾絕奔求父屍出入烽燧卒收遺骸歸胡文忠見而器之謂異日必爲偉人居事母

以孝聞與弟友愛甚勸規以義式好無尤視諸姪如已出而稍不率教訶譴立至戚族之貧者時周恤之其不能讀者必設法資而教之嘗師事毛子遇王少白李次坡諸先生知行並進別有心得造詣所至雅近姚江庚午春入邑庠秋領鄉荐第四名時君方弱冠也共以爲翔步木天指顧間耳而迭上南宮不第庚辰以大挑二等就教職署羅山訓導尋授西平教諭所至以身心性命之學勸化士子學者翕然歸之而在西平任久蔚成人才居多醫士僚友亦願留而受業於門如陳孝子國順陳孝廉銘鑑其尤著者也他若廣植義塾釐定保甲每月親赴各鄉申講修齊之義宣示友助之益父老子弟相率觀聽莫不油然而生感縣令左公輔最倚重之嘗謂吾治西平實賴子蕃力學使邵松年力倡洛學廉知其才引爲表率而巡撫裕長學使朱

福詵遂以學裕才優體用兼賅奏准以知縣歸部選用嗣學使
林開幕又密保以操守謹嚴實心任事逾月即選授斯缺時癸
卯秋間也君年已五十有七矣人以西匪燎原數年未熄勸勿
往君則曰王陽明之龍場于清端之羅城豈嘗作畏避想乎吾
知報國恩繼先志耳竟置妻于於家攜一姪兩僕赴之抵省不
數日奉委署客縣事客本荒瘠鄰匪又出沒其閒亦號難治君
乃單車抵任首召父老詢疾苦嚴汰陋規倡辦團練力清案牘
創立學堂冀以除民累輯民心即可清亂源殺匪勢耳數月之
間民氣大振而風聲鶴唳夜輒數驚寢食俱廢者久之遂致怔
忡舊疾不時觸發雖自知罔濟迭請開缺猶力疾治事不稍息
竟以本年三月二十一日某時卒於任所殆所謂慮難不計性
命不惜者乎嗚呼傷已向使早登顯仕得行所學其所以報國

恩繼先志者豈至僅以邑令終即使治一邑而假以數年從容
展布亦無難捍患禦難爲斯民福而顧出之於遲暮置之於邊
荒乘之以兵燹責之以繁劇艱險危迫致殞其性命耶則令吾
感君之言壯君之志不能不悲君之遇也君生於道光某年月
日時春秋五十有九某年月日葬於祖塋妻杜氏妾某氏子毓
祿女四銘曰學以篤而益精器以大而晚成抑塞磊落蔚爲奇
英獨行其志不負生平振振乎鐸有聲孺孺乎琴嗣鳴家學源
遠世篤忠貞令聞令望子孫其繩

衛獻琮墓在輝邑李固村東北

邑人石振聲衛鼎臣墓誌銘員外郎衛君韓獻琮字鼎臣十三
代祖由陝西韓城遷居河南新鄉縣之北關世有隱德曾禮殿
華附生改州吏目分發貴州祖世傑廩貢生歷署魯山河內教

諭湯陰密縣訓導封皆光祿大夫考榮光諱授光祿大夫撫湘
撫吳撫越撫晉所至有聲妣氏朱繼母氏張皆封一品夫人兄
弟六人君次第三配宜人孫氏滎陽候選同知欽最女也君生
而深厚能忍讓光祿公器之曰將來能任事者必爲此子七歲
時隨光祿公在山東濟東道任由黃河溯流旋里偶立船側眩
暈墮水中踰刻拯出自謂甫落水卽有老人援之故無恙讀書
務探要義光緒三年春補弟子員己卯鄉試薦而未售自是不
復進取專心講學集同人立育英文社又以書院經費支絀捐
千金爲諸生膏火性尤嗜宋五子語錄及皇極經世夏峯集諸
書有心得輒爲劄記十三年河決鄭州鳩噉徧野君慨捐巨賑
奉旨賞員外郎銜十八年山水陡發邑北數十村被淹災黎日
不舉火君買船運食曲爲保全後各村送匾額以報二十六年

拳匪肇亂河北道岑督辦籌防君慨捐三千金助餉復在本縣捐銀千兩就地募勇保護桑梓其他恤鄰贍族施與亦毫無所吝初光祿公由越調晉請假回籍偶因中風病癱瘓言語蹇澀君以意消息悉中親隱光祿公卒經營喪葬皆如禮君之兄獻琛獻琨先君卒諸姪輩獲拔萃列黌序者胥賴君成立獻璜獻璠獻玟皆張夫人出君情篤友于人不知爲異母弟也綜持家政以一身節儉倡待僕婢甚寬從無疾言遽色然亦皆奉命惟謹嗚呼君之懿行堪仰而其內助之賢則尤有不可及者宜人工詩能文十八歲歸於君敬戒無違事舅姑以孝聞娣姒闔室和氣相洽無所出勸君置側室李氏相處甚善聞者歎服李氏生五女宜人撫育周至訓以女小兒語女誠內則等書凡各女紅亦身親教導君卒取君之胞姪芳齡爲嗣越數日趨侍張夫

人側曰媳自入門過蒙寵愛時以有愧婦道爲憾今吾夫既逝
辦理亦粗就緒良人其庶瞑目矣嗚咽者久之暈倒在地遂不
起亦烈矣哉君生於咸豐七年六月二十九日亥時卒於光緒
三十二年六月二十二日丑時享壽五十歲宜人以咸豐八年
六月初十日酉時生光緒三十二年七月二十八日亥時後君
三十六日卒年四十有九嗣子娶汲縣孫氏長女適候選縣丞
中牟縣張熙恩次女適尉氏縣劉成元三女五女皆未字今歲
已酉將以某月日合葬於輝邑李固村東北先塋之次芳齡奉
狀稽顙以納擴之文請辭不獲已因按狀而次第之銘曰性生
孝友似續家聲休休雅度謹厚和平悃愾無華持躬儉約濟急
拯災恩推溥博神馳箕尾謝絕塵緣嘉配身殉勵節彌堅儒宗
壺範我心孔懷鑽石勒銘瞻顧徘徊其德不朽此石常馨千古

魂魄永慰幽冥

夏登雲墓在縣西南夏庄

汲縣李時燦夏從龍墓誌銘孔子曰吾觀於鄉而知王道之易易也古者之治始於閭里成於家國後世一州縣逾侯伯之封教養道弛當事者以術羈縻一鄉一邑開率不復措意忠信明達之選湮沒於草茅而汨日蠹近日取法東西稍注意地方自治非佐治有才不能獲效人文消乏識者慨焉時燦伏處田廬輒本此意求之得新鄉縣夏先生先生諱登雲字從龍新鄉夏莊人曾祖法師妣李祖永慶妣王王父會元妣苗杜幼有至性饒術智總角時母病禱以身代同治間東匪竄擾儲村人數輩遇賊曰彼騎我步逃無生理部署村人每聞文許刃向賊不敢逼人服其畧持家謹嚴有法雖兒童不敢以惡聲加人淡泊

自甘子孫游學費雖鉅不惜且謂之曰非以此療貧不讀書恐不能安貧耳歲時修墓務躬親手植柏數百株葱鬱成林每作事必計久遠類如此與鄉人處剛介不阿莫敢干以私排難解紛當幾立決村人以公益結社歲久弊叢積先生破除情面釐剔無遺有餘資置備器皿同里喪葬婚嫁無少假者積穀數十石兩遇荒歉取振村中貧者約歲豐息償人便之晚歲喜讀易旁及陰陽雜家韋布終身未嘗忘世自國家頒布立憲薄海臣民喁喁望治乃遲之又久明效未睹安所得千百其人忠信明達如先生者維持自治以奠王化之基固有心世道者馨香以祝也先生生於道光九年九月十五日卒於光緒三十四年四月二十三日享壽八十歲以子奠川貴誥封奉政大夫配柴氏繼配穆氏均封宜人子男二奠川光緒甲午進士以知縣分浙

江奠山太學生皆穆宜人出孫男二治本治範曾孫男一伯濤
奠川等以先生卒之明年葬先生屬爲銘銘曰古鄴之南有隱
君子官不知名衆人所式太行魏峩岡阜遠迤靈閣幽宮法存
梓里我思古道行遠自邇鄉治之成由先生始

王安瀾墓在縣南朗公廟東南原

安陽馬吉樟王靜波墓誌銘君諱安瀾字靜波髻齷端重如成
人初就塾貧不能具脩脯簞瓢捽茹人所不堪而君攻苦益甚
年十四丁父艱生計蕭摵常樵採誦讀既應童試不利值光緒
丁丑大祿棄儒而賈爲人主計食指稍餘豫南歲豐奉母挈季
挽鹿車渡河躡跋日百里風雪稜稜偃蹇柘城間僅得餬其頤
頰居數月柘人士驚爲宿儒爭與締交旋北歸入邑庠食餼乙
酉舉於鄉庚寅成進士壬辰授編修君在詞館有聲僉謂君且

大用君亦慨然欲有所爲以效於世會甲午東事起將帥庸懦
失機君憤焉集東朝官數百連疏抨彈和議將成猶偕同官十
人伏墀爭卒無及君亦以母在堂乞假歸絕意仕進君爲人堅
卓果毅嚴義利之辨自諸生時已大通六經指爲文章論設有
法度通籍後與李君時燦史君緒任王君祖同屠君爾敏相切
礪益廣購經史百家之籍於掌故政書地志兵農家言朱黃校
讎不辭手庚寅畿南大水吉樟約君及同志二十人汎舟施義
賑君冒暑遊往勇百倍己亥河北饑京紳募散賑糶屬君尸其
事窮歷山陬冰地雪天全活數萬庚子拳餓張兩宮西幸河北
道西林岑公竒君才與籌守禦君盡約知交分任不匝月集金
十餘萬成軍六營繕械精練河朔恃無恐豫撫長白錫公雅重
君延王講鄘南湯陰覃懷瞻韓諸書院以有用之學相助亂定

君謀於衛輝郡守培材必資學校籌款巨萬闢經正書舍庇九
邑峻髦與同郡名流以崇品力行相導帥奉詔興學衛屬獨先
完備巡撫豐潤張公疏君任省會高等學堂監督提學曲阜孔
公深倚重整飭不遺餘力君以醫貧弱必興實業勸立憑心公
司煤業大振開河南鐵路研究會舉總協理豫軌公司成立君
力居多大府疏請君襄辦駐所專營墾墾竭誠務殫心頓而病
亦基於此痰喘宿疾勞篤觸發適誤吞西法補齒竟不起戊申
十月十二日卒於汴生於咸豐七年十月二十二日年五十有
二自變法以來新舊相抗惟公信誠慤者爲能任事無新舊一
也君少讀宋五子書植其根氏生於憂患險阻備嘗而澹泊明
志一錢不苟其行已以絕詐僞屏夸誕爲要旨及其莅事委曲
必盡其力雖至艱大恢恢乎其優爲也今世風囂薄財政皆窳

吾豫尤甚朝廷銳意立憲百度需才公信誠慤如君者搢搢其
間其福桑梓而惠章逢者豈有涯邪天不假年厄於金牙樞歸
之日各校輟課執紼者數千人重可悲已君之先世濬縣人明
季遷新鄉之朗公廟曾祖兆祥祖登元考印贈奉政大夫曾祖
妣陳祖妣荆母馬贈封宜人舅弟四伯安仁叔安邦季安定君
其仲也配許宜人子二常慤次常慤女二長適李伯莘常慤
以明年宣統元年二月初八日葬君縣之南鄉子首午趾以吉
樟與君交深郵狀乞銘銘曰於戲靖波質厚材良既屯而累既
用而藏其中自足物莫之傷其用未竟德被於鄉大任業業淇
流湯湯我銘不誣上質三光

杜世靈墓在西南東石碑村東

武陟孫甲榮清太學生杜翁墓誌銘翁誠慤而力於行愛朱柏

廬治家格言懸壁間曰必三復以體於身教於其家行於其鄉而家與鄉之人化之家日盛而鄉俗以醇有古篤行君子之風焉幼穎悟入塾年餘即習四子書或偶見其大義然貧困弗克竟學性至孝躬耕且佐弟賈以給甘旨間寢視膳無或懈父嚴厲凡所責讓年雖壯必跪而順受之父母病湯藥必親衣不解帶者累月沒則哀毀至骨立經營喪葬務盡其情一時閭黨間有杜孝子之稱後家漸裕教子尤嚴就傅必延名宿成童卽令各有執業毋得飽食而嬉其質器可造就者則不惜重貲以期其成故諸子或學或農或商而皆克挺然有以自立翁雖堅苦起家然慷慨好施與生平濟急拯危難更僕數其善者約同志創設恤貧會手訂規章凡婚嫁疾病死喪皆有資助鄉里至今賴之蓋生平拳拳於柏廬之訓而發施諸行事者如此世有讀

萬卷書擢魏科躋顯仕口稱仁義自以爲鄒魯濂洛之徒而閨
圻以內父子兄弟間往往不可以告人者以視翁之篤信謹守
不多言而躬行其得失爲何如也翁諱世憲字敘庵新鄉之東
石碑村人曾祖永順祖繼魁父來成兄弟二人翁居長配王氏
子五常舉常正先翁卒常立法律專門學校畢業歷任校長知
事科員等職充省議會議員幹練明達有聲於時常有業農常
綱業商孫十一發文發楨發儒均畢業以所學應當世務發祥
發年發春發泉發秋發瑞發京發新幼讀翁生於道光二十九
年七月卒於民國十年六月壽七十有二葬有日矣常立等函
狀請銘不可辭乃爲之銘曰論語半部小學一編翁有篤嗜踵
前賢柏廬格言座右懸石碑仁讓靄瑞烟松楸鬱鬱萬千年彼
孜孜口耳者胡爲焉

夏奠川墓在縣西南夏庄

汲縣李時燦夏子定墓誌銘古人重庸德後世尙畸行非道德之有異時使然也竊綜余友夏子定生平有感焉子定諱奠川號筱仙先世籍固始以戎務起家明初有自成公者從太祖軍充十旗長屯田新鄉七里營因家焉歷五世遷夏庄逮子定十八世矣曾祖考永慶妣王氏王氏祖考會元妣苗氏杜氏考登雲封奉政大夫妣柴氏穆氏贈封均宜人穆宜人生子二長卽子定次曰奠山子定生而岐嶷性傲岸不苟同世俗其初就傅也世方務剽竊掇拾爲舉業計子定獨超然章句外塾師講解冥然若罔聞慨然曰讀書貴求自得不得然後請於師否則人云亦云祇口頭禪耳且恐先人爲主轉窒我本然之靈明非先師憤啟悱發之旨也抑視躬行何如豈僅區區青紫哉嗣後肄

業大梁河朔兩書院方同人聚談朗誦子定或面壁靜坐或獨
遊曠野仰思默體別有會心又嘗北走太行冀得異人遇一老
者戒之曰子遺書於篋不告而出獨不慮堂上念子乎卽悚然
返前清光緒乙亥河北大饑子定手挽鹿車移粟數百里外未
嘗輟讀後補郡博士弟子員己丑舉於鄉甲午成進士以知縣
分浙江晚情之季士品蕪雜奔競成風不得大有力者噓植輒
不能一遇鄉前輩某公以子定初筮仕途擬函屬浙省達官爲
之先容子定聞之竟不往謁兩次赴浙攜資而往資盡而返遂
絕意仕進終不屑自貶也共和肇造政黨角立舉國風靡子定
送其子赴武昌入校教之曰近日黨派紛歧汝今遠出當一以
求學爲主毋得輕言入黨必不得已再退學還鄉里其果斷如
此孟子曰人有不爲也而後可以有爲子定當滔滔皆是之日

獨能介然自持是則今人所謂畸而古昔所謂庸也余自前清
末造二十年來遊跡田廬與新鄉王靜波輝縣史小周封邱崔
秀嶺同邑王小汀剗經正書舍萃河朔同志相與講學於其間
又開辦衛輝中校散放濟源等處義振組織洛潼鐵路公司事
關公益子定無役不從民國建元豫督張公復委主沁工事宜
力疾就道未獲觀成而卒蓋民國二年陰歷四月二十一日也
距生於咸豐五年正月十三日壽五十有九配楊孺人繼配王
孺人子男一治本孫男二伯濤伯森治本將於是年十一月十
九日葬君屬爲銘銘曰課士以經爲人師兮聚族以譜爲世儀
兮目君爲儒心則悲兮與君參禪猗有爲兮皓月兮清風岡巒
隱伏兮松柏葱蘢太行有阜兮泉源在東魂其歸來兮是爲子
定之官

張恒上墓在縣西南五十里杏庄

蕭山何嘉樹張樂天墓誌銘歲壬辰嘉樹遊學梁園締交多河朔篤學君子直諒之友以張君樂天稱最朝夕過從交久益摯君善屬文書院課常冠儕輩屢應鄉舉未遇既不得志於有司乃歸里授讀益潛心於經史及宋五子之學甲辰創辦高等小學校主講席成就甚衆民國乙卯秋嘉樹來知縣事君適充甲種農校監督兩年來就商學務語不及私植品之峻蓋始終如一曰今歲暑假期考未竣無疾而終於校舍同人爲位哭之葬有日孤慶龍以狀來請銘曰知先君者無逾我公受而爲銘按君諱恒上祖紹軒父修鼎有兄曰恒大君其仲也幼慧能讀十九歲遊庠旋食餼乙酉貢拔萃循資注直州判候選肄業河朔書院時與李敏修史筱洲夏子定王靜波諸君皆攜手爲砥礪

交已亥饑竭力襄賑庚子匪亂倡辦守衛以安衆心生平淡泊
自甘一介不苟居家以勤儉爲本處世以退讓爲高嘗自顏齋
額曰學吃虧齋遇鄉鄰有爭執之事輒力爲排解惟一涉詞訟
則峻拒不聞君之立行如此劬勞學務蓋已十年六考畢業遽
終於此非所謂經明行修守先待後者耶君生於清咸豐六年
七月初二日卒於民國六年五月十一日得壽六十有二銘曰
甯前緣滿白首其中達材成德樂也融融余守土於茲兮將何
以圖君之終刻方石以爲銘兮永安厥躬

新鄉縣續志

藝文志上

文所以載道也豈末藝哉經史之流布人間如日月之經天江河之緯地亘千古而不可磨滅者文也故大而豐功偉烈小而瑣事俚言非文無以宣其蘊而永其傳然史家藝文之志因人因事各有義例勢不能搜集無遺也惟擇其尤雅而有關於世道人心者著於篇庶不悖簡要之旨也乎

公牘

擬平粵匪書

王揆一

人必有所恃而興事必得其緒而理不幸若治絲而棼必先審其致敗之由然後能建轉敗爲功之業如今日之兵亦然逆匪滋擾已閱四年由廣西而兩湖而三江所至輒陷而卒不能一挫其鋒

其故何也說者曰賊有邪術凡裏脇之人先令唵經飲藥飲藥之後心即迷茫不計生死是以賊匪與我兵接仗雖婦女幼兒皆踴躍從事其所用藤牌較官兵獨堅銅礮較官軍尤利我兵不能制勝職是之故噫豈其然哉所謂唵經飲藥此該匪愚人故智斷不能實有其效而所謂藤牌銅礮器亦猶人并不能如我兵之諳習而有把鼻自古謀爲不軌有先習武藝而後竊發者乎逆匪馮雲山等初嘯聚於潯州之斷藤峽山中僅三四人其所愚惑不過飄蕩賭博者流迨至黨羽日多官兵不能隨時撲滅故意遍貼逆詞多方恐嚇而妖燄以張至官兵之不能勝賊其始由於兵之不肯用命而其後賊勢漸狂兵勢漸怯至於動輒失利而聞者膽落當此之時以羸卒而當強寇何異驅羣羊而攻猛虎雖懸令於軍前日退則必斬未能期其必盡力也然則今欲兵強當如何今使

有力者與無力者鬥其有力者可以扼牛其無力者尙不能搏兔
則有力者勝又使有力者與有藝者鬥其有力者勇能兼人而拳
曲臃腫其有藝者儘中人而縱橫自如則有藝者勝更使一有藝
者與羣無藝者鬥其羣無藝者足亂手忙顧此失彼其一有藝者
手疾眼快當之披靡則有藝者獨勝然則今欲兵強斷非訓練精
工不可宋岳武穆以背嵬兵八百擊敵人十萬我朝楊宮保以一
百親隨兵弁破滑縣道口賊八千由此觀之兵亦貴精而已議者
曰子迂矣當此豕突狼奔恨不滅此朝食安得優游時日俟其熟
習而後用哉曰不然方今所調各省官兵暨隨營進剿鄉勇不下
十餘萬衆其中豈無敢戰之士如岳武穆之背嵬兵楊宮保之親
隨兵弁哉側聞河南人羅景川者精於鎗法前在廣西接仗首先
刺斃二十餘賊以兼護董鎮受傷陣亡至今軍營尤豔稱之漢陽

遊擊於城陷後來往轉戰殺賊數十名後以衆寡不敵死未聞該
遊擊是何姓名亦不知此事是否真確今軍營中如羅景川與漢
陽遊擊當不乏人而所以不能收其功者其在官弁或職分卑微
不能盡其才其在兵勇或混處儔類不能合羣力以顯其竒也茲
擬請下令於衆凡精於鎗矛刀棍繩鞭之類使各書技自獻并註
明勇可敵若干人數此外或捷足善走或縱跳擅長通共挑選一
萬應不難得如不足數仿照王陽明平南贛時行文各府州縣召
募咨送此等人各省皆有而山東河南直隸尤多於是斟酌分爲
數隊每隊挑撥手鎗抬鎗藤牌數百人幫護而以精藝中之有膽
畧者帶之其餘官兵或分佈隘口或留守營盤實在疲輒者儘可
裁撤以節糜費而充犒賞而此一萬數千人作爲衝鋒破陣之兵
三帥爲之明定賞罰申言利害激其忠義之心而作其果敢之氣

其技藝既精則旦暮思奮其心力既一則唇齒相依以此克敵可
決必勝蓋藝精則膽壯膽壯則氣豪以我奮發之師攻彼雜湊之
衆如虎豹之吞牛羊如鷹鷂之逐鳥雀若彼賊匪譬之狂犬其聚
也一犬吠形衆犬吠聲則其散也一犬受制衆犬立遁迨至軍威
既振兵實知賊之無如我何而從前畏怯之旅皆思奮臂而前斷
不至聞風即遁矣議者曰兵之畏賊畏其礮也今專重鎗矛刀棍
等類能禦礮乎曰又不然行軍遠則宜礮近則利用刀矛而兵之
爲賊所敗非敗於不能遠攻實敗於不能近擊試思自廣西用兵
以來大約死於刀矛者十之八九死於礮者十之一二則又何疑
而不爲精於鎗矛刀棍之選乎况從前賊匪不過烏合之衆數年
來經戰陣多畧知調度如抄襲一法我兵屢受其害兼之黨羽日
衆各色匪人無所不有而强悍巨盜亦難免不羅入其中此時如

病人燄火內攻須以大黃王之蓋非大黃不能斬關奪隘故曰今欲兵強斷非訓練精工不可至於嚴號令設偵探如王陽明每隊中用本地數十人作爲鄉導尤爲行軍要着要之用得其人與用之者能得其心則隨時應變有法必行甚有不必以成法拘者出奇制勝皆於訓練兵勇中括之可也議者又曰國家養兵二百餘年原以備緩急之用子以爲除挑選數千并酌量留守營盤分佈隘口其餘羸卒盡行撤去若不足一萬之數募勇充當勢能行乎且現在兵糧尙形拮据而募勇之費又將安出不知爲國家計當通盤籌畫用兵數年賊勢日肆猖獗而復不思所以勝之之法者滋蔓難圖伊於胡底況兵糧一日數萬金何在非出自國帑乎或者兵自爲兵勇自爲勇斯亦變通權宜之道雖其中支費較繁而早平一日則所節省已不可勝計方今賊匪復又分股竄擾河南

勢欲北渡急宜選募本地藝勇數千協同官兵嚴守北岸然後自北而南商謀夾擊則妖氛不難剪滅而人民受福無量矣

擬剪除土匪議

王揆一

伏讀制軍札以去年粵匪竄擾湖南各處土匪互相勾結責飭州縣刑罰之弛并飭將所屬匪人分別造冊實呈仰見制軍除暴安良肅清地方之至意在道州供職數年頗知賊匪始末茲將匪人各色名目并地方官不能剪除緣由與夫搜剔根株之法謹縷書之以待採覽按土匪不一其最著者曰齋匪曰會匪此二者謀逆則同惡相濟而即其平日之積習而別白之則齋匪之禍隱而深會匪之禍顯而烈也齋匪者不飲酒不茹葷羹齋戒之意也其初誘人誦佛家經託導引術謂可祈福免禍益壽延年故惑人最易而陷溺獨深惡毒所流有一人而污染及數州縣者迨至蔓延日

久遂肆僞妄其傳徒則設壇首匪服優人黃色衣冠登壇獨坐持桃木劍畫地說法衆皆跪而聽講甚有婦女與無知紳士并墜其中富民一爲所愚不惜捐資產入會其餘捐錢助穀隨在皆有大約齋匪會匪皆尙哄騙而齋匪之聚斂尤工所以民間謠言有齋匪出錢會匪打仗之說然平日並無偷竊之事會匪則多屬竊賊或遊蕩賭博者流約數十人於僻山古廟中聚飲謂之拜會內推一人爲大哥遞次由二哥三哥以至於九餘皆爲老滿老滿者弟之名號也拜會日期及所用錢數皆以九計亦有以哥爲將者謂大將二將三將云云竊賊肆行擄掠或率搶奪其流蕩賭博者坐地消贓有事則吊碼爲號碼以半個錢爲之粵匪則以板榔吊碼者以碼吊人隨到隨行由是輾轉相邀不至者割耳責之以故該匪所聚甚速齋匪吊碼與會匪同尤可惡者一村一二百家其中

有巨匪一二人餘百數十家因畏其虐斃半列其籍此二種人湖南各屬皆有而衡永郴桂尤多州縣不能遽剪根株何也該匪聲息相通此拿則彼竄東緝則西逃此已犯案者然也至於未犯案者地方官思爲防禍未然之舉着落地保地保不敢報訪之紳士紳士不敢言官亦知民之畏其報復也於是密爲開示曰至張在我斷不汝累也百姓狃於成見終不敢大發其伏且百姓即使能言亦止能言著名巨惡其未著名者亦不能逐一詳報至於一村半爲逼脅舉行團練固屬以火救火編查保甲仍是以匪保匪盡行懲辦則可憫稍爲寬縱則玩生此等斷非倉卒可能收效况辦理不善卽有意外之虞因循者固難期其振作風厲者亦止能安於目前賊匪日熾職是之故然則必如何辦理而後能革此積習日久之惡俗哉蓋地方當積敝之後於官必專其責成而又寬以

歲月斯其用心也周於民則明其利害而又濟以賞罰斯其集事也易今擬於各府州縣擇其匪類聚多之處挑其才廉有膽畧者任之約以一年報最明定章程同時併舉以杜逃竄其辦法雖各處情形不同大約仍以團練地方編查保甲爲主但團練編查非地方紳士幫辦不能得力而紳士賢愚不齊且囿於鄉曲難免不顧此慮彼必先去其依違之見而後賢者得以踴躍集功愚者亦不得不勉爲報効惟上憲嚴扎州縣並飭學官着重紳耆幫同查辦一面先開各鄉查辦紳士花名並取不敢隱匿切結資呈其有從中作梗及明知不肯舉報者從重治以通匪之罪實在出力者許地方官據實保薦如此則整頓地方本屬賢紳士所日夜以祝者而於閭里間又可藉詞解說自樂得澈底根究愚者即稍有異志但念身家倚爲禍福必不敢過爲隱瞞官紳同心而因時制宜

隨地立法辦理自屬易易至於首惡及紳士入會者立即處以極刑斷不可稍爲姑容其餘被脅之家務必設法逐戶揭明寬其既往予以自新造冊時分別另爲開出並令合團具保一年無事再行附入公冊其州縣中或有錮習太深實形棘手者臨時稟商設法辦理總不許含糊了結所有編查團練紙筆之費或詭譎匪徒須得設線勾拿不無支用着地方官先行自墊事後按欸據實報銷其尤爲妥協之處准保超陞以示優獎若此者官以寬免處分而無顧忌之心民知出自憲恩而無報復之慮一年後風清俗美庶幾仰副制軍爲國爲民之心而與百姓共享昇平之福也豈不懿哉

奏參已革兩江總督何桂清摺

郭祥瑞

爲已革大員情罪重大請明正典刑以昭炯戒恭摺具奏仰祈聖

鑒事竊惟刑賞者天下之大權也有功必賞則天下勸有罪必刑則天下懲紀綱之所由飭國威之所由振胥係乎此已革兩江總督何桂清蒙兩朝厚恩至優極渥宜如何感激圖報乃自咸豐十年春間江南大營吃緊何桂清駐紮常州擁兵自衛幫辦軍務張國樞屢檄帶兵官張玉良赴援何桂清堅留不使去以致大營兵潰及賊薄丹陽官紳請撥兵援救何桂清不發一兵致賊匪直犯常州彼時常州餉銀米糧可敷一年之用兵勇計有數萬各鄉團練亦併力堵禦如果嬰城固守蘇常何至失事乃何桂清突開東門帶兵逃走經紳民耆老遮道焚香涕泣跪留喝令兵丁放鎗擊傷多人登舟遠逸至常熟之十里亭地方縱容親軍放火搶掠誠如我文宗顯皇帝聖諭以總督重臣輒思逃避忍心害理殃民誤國種種情節實出情理之外等因欽此竊以情有可原者固可倖

邀寬典法無可貸者豈容倖逃顯戮今何桂清身任兼圻棄城逃遁縱兵焚搶以致蘇常相繼淪陷蔓延浙省東南大局之壞壞於何桂清之手百萬生靈慘遭塗炭塗炭於何桂清之手是何桂清之罪上通於天死不足以蔽辜矣迨經撫臣徐有壬參奏奉旨擊問來京猶復遷延逗遛不肯就逮其心中尙有朝命耶其目中尙有國法耶長寇虐民偷生藐法不惟江南百姓欲得其肉而食之即都中士大夫下而至於愚夫愚婦無不痛心切齒此乃所謂國人皆曰可殺者也伏查軍興以來未有省城失守而督撫可任其逃避偷生者從前湖北之巡撫陶恩培安徽之蔣文慶金陵之陸建瀛廬州之江忠源浙江之羅遵殿王有齡蘇州之徐有壬皆與城存亡即武昌二次失守青麀逃避旋即伏法今何桂清罪大惡極中外共知若不立置重典何以對封疆死事諸臣且恐各省督

新刻續編卷之三
三
撫及帶兵大員聞之以爲僨事如此猶可倖免尙復何所顧忌夫政尙寬大亦懲姑息寬以待良善嚴以肅法紀刑賞所係不可不察也相應請旨將何桂清明正典刑以昭炯戒庶國法由此而伸紀綱由此而振各省督撫及帶兵大員亦皆有所震懾軍務可期速平矣愚昧之見是否有當伏乞皇上聖鑒謹奏同治元年五月二十七日

奏請甄覈捐納人員

郭祥瑞

奏爲捐班流品太雜請飭各省大吏嚴加甄覈以清吏治而弭盜源恭摺具陳仰祈聖鑒事竊維捐例之設由來已久每遇河工軍需耗費過繁不得不權開捐例以濟用然從前捐例銀數過多捐生率皆殷實之家爲榮身非爲牟利也自捐銅事例一開而流品之雜名器之濫有市井駟僮工於謀利者有劣幕蠹書慣於作弊

者有土瘠無賴攘奪攫拏而捐者有輿臺僕隸張羅雜湊而捐者銀數無多易於集事將本求利視同貿易一旦得缺視爲利藪侵蝕公帑魚肉百姓無所不至迨至激成事端耗費軍需計其所捐之數不值九牛一毛即使照例懲辦不過新疆軍臺而止而彼方挾其貪囊可以營救并可以捐復求其潔已愛民實心任事者則十無一二悉以此輩散布地方吏治焉得而清民生焉得而安盜迹所以愈勦而愈不加少也然而京餉緊要賴以濟用捐銅事例非惟不能停止抑且期其踴躍然則將如之何計惟有嚴加考覈之一法可以補救耳雖人之賢否不盡係乎出身然各省正印人員捐納者十之七八正途出身者不過十之二三可否請旨飭令各直省督撫同藩臬兩司遇有捐納到省人員認真察看或考其行誼或訪其聲名或令作牧民之論以覘其底蘊或令讀吏治之

書以練其才猷其有惡劣不堪造就者隨時甄汰之庶幾考察有良法而後地方有良吏將見官清而民自安民安而盜源弭而於捐局亦毫無窒碍愚昧之見是否有當伏乞皇太后皇上聖鑒謹奏同治二年五月二十一日

請繞道回籍省親摺

衛榮光

奏爲微臣母病增劇情實難安懇恩賞假先行回籍省視以盡子職恭摺仰祈聖鑒事竊臣蒙恩補授湖南巡撫當即具摺叩謝天恩並請陛見旋即交卸浙藩迎摺北上茲於本年三月二十日行抵清江浦途次接奉原摺奉旨著來見欽此應即欽遵赴都跪聆聖訓乃適接家信以臣母病勢沉重念子情切亟思一見臣接閱之下午夜徬徨莫知所措伏念臣母年近八旬氣體衰弱從前雖有目疾精神尙可支持光緒元年臣蒙恩簡授安徽臬司進京陛

見叩辭後請假回籍省親卽欲迎養赴皖無如臣母目疾未愈步履又復艱難憚於遠涉惟助臣以盡心職守勉圖報稱且臣有胞兄在籍侍奉是以臣陟圯之懷尙可稍釋今家信內述及臣母入春以來病勢日增飲食日減精神益形委頓殊有風燭草霜之慮私衷戀結刻不能安欽維我皇上教孝作忠原無二致推恩錫類必許從權臣今年五十有二母年七十有八報國之日長事親之日短合無仰懇天恩賞假一個月客臣先行回籍省視俟母病稍痊假期屆滿卽由本籍星馳入都泥首宮門跪請聖訓斷不敢稍有耽延致曠職守所有微臣母病沉重請假先行回籍省視緣由理合恭摺具奏伏乞皇太后皇上聖鑒訓示再此摺係借漕運總督關防臣於拜發後卽日起程回籍臨穎不勝戰慄屏營之至謹奏

保薦賢才摺

衛榮光

奏爲敬舉所知以備擢用而資策勵恭摺具奏仰祈聖鑒事伏維
皇上親裁大政日理萬幾端賴慎選賢能量材驅使以收羣力之
効際此四海承平亟宜整飭吏治培養元氣以厚民生而爲治之
道要以得人爲先經濟與文章並重庶幾君明臣良一德一心慶
成邇治以慰天下人民之望臣服官中外三十餘年受恩至重未
報涓埃亦知愚者一得無補高深而秉性戇直難安緘默茲查有
翰林院侍講學士前浙江學政瞿鴻禨湖南進士才識兼優通達
政體前在學政任內整飭學校裁革浮費士習爲之轉移州縣亦
受其惠維時與臣常相過從議論時事能持大體不尙浮華臣於
前年年底循例密陳已邀洞鑒又前內閣學士陳寶琛福建進士
有膽有識體用兼備立言行事迥異時流前在江南幫辦海防事

宜頗有建白迄今置之閒散未免可惜又現任福建興泉永道吳世榮安徽供事辦事果敢不避怨嫌折獄理財皆其所長實爲異途中不可多得之員前經升任撫臣劉秉璋閩浙總督臣楊昌濬及臣迭次奏保奉旨交軍機處存記有案以上三員洵稱幹濟之才應如何錄用之處伏候聖裁臣謹不揣冒昧敬舉所知恭摺具奏伏乞皇太后皇上聖鑒謹奏

預遏亂萌摺

衛榮光

奏爲嚴緝北路奸匪以杜亂萌而靖民志敬陳管見仰祈聖鑒事竊平賊以攻心爲要圖去惡以清源爲急務宋逆經格林沁擊散後分股四竄官軍節次追勦諒不難尅期蕩平抑臣猶有慮者首逆雖逃黨與尙夥顯著之宋逆縱滅而隱伏之宋逆仍多除惡不盡必至滋蔓難圖如直隸山東河南交界處時有無賴匪徒

三五成羣不事生業晝則散處夜則嘯聚或攔劫商旅或焚掠居民本處人避賊之名稱爲黑頭光棍地方官以未成巨案概置不問爲時既久勾結日多肆行無忌近聞官軍追賊於該處所竟有於賊至之時互爲聲援兵至反放槍相拒者其爲通賊已無疑議今日之小奸卽異日之大慙積薪厝火實深隱憂所以伏而不發者賴僧格林沁之聲威足以震懾之耳一旦大兵南下餘賊糾約夥黨投隙乘時揭竿一呼伏莽四應將更有變而加厲之勢皖省張仲玉諸酋首其前鑿矣前湖北撫臣胡林翼治鄂時與國崇陽等處從賊者甚多兵至則爲民賊至則從亂胡林翼以保甲之法行之勒令戶首捆斬三千餘人迄今並無土匪滋事之案其時隨胡林翼襄辦一切其成效皆所目睹誠見養癰以貽患不如除暴以安良度勢揆情不容不爾也蓋甘心爲賊之人獷悍成性既

不能默化爲馴良嗜慾多端又豈肯自安於耕鑿使非殺其助亂之勢讐其思亂之心將已叛者必無革面之期未叛者皆有生心之隙奸民固易爲煽誘良民亦苦於脅從以三省彫敝之餘倘再經久擾則民生益蹙國用益虧方今該處地形數千里南北不能相顧東省方定而燕豫之賊又熾惟一僧格林沁支拄其間若徒專制一方則勢難旁鶩若欲兼營四要則力又奔波先事之圖誠不可不扼要以制之也相應請旨飭下直隸總督山東河南巡撫會商辦理於直東豫三省連界地方擇一廉明忠勇久隸戎行之員作爲統領挑選馬隊一二千人步隊五六千人擇要駐劄嚴明紀律勤加訓練則平時有藜藿不採之威臨時有折衝千里之勢併責令各州縣官實行保甲清查戶族所有宋逆黨與暨素日著名土棍捆獻到營分別斬釋使桀黠不敢肆志奸宄無所容身不

特本境惡民既除卽山東與安徽接壤之處萬一有警亦可資以
抵禦無俟動煩徵調矣臣供職詞曹例無風聞言事之責然當此
言路宏開有所見聞亦不敢自安緘默知識構昧是否有當伏祈
皇太后皇上聖鑒訓示謹奏

責成鎮道防守片

衛榮光

再近年皖捻肆擾大河以南數十州縣蹂躪幾徧惟河北彰衛懷
三府自咸豐十一年長鎗會滋擾後至今尙屬安謐所恃者黃河
天險爲之捍蔽耳黃河爲三府屏障而三府又爲畿輔藩籬萬一
防衛不嚴捻匪搶渡過河於大局實有關係前以添設河防大臣
俱不得力因而撤去臣愚竊謂派一客官權雖重而呼應不靈不
若責成地方任旣專而聯絡較易若因噎廢食非所以維持大局
也河北道有分巡之責河北鎮有統將之任皆宜講求營制肅清

地面即如今年東匪滋事該鎮道若能早設邊防協力助守於宋
逆餘黨竄擾濬縣內黃之時迎頭截擊使該匪進退無據則剪滅
固甚易易乃以三二百餘匪往返數次如入無人之境未知該鎮
道所司何事也此股逆匪爲害尙淺所慮河防不嚴捻匪北犯其
害將不可勝言應請旨飭下河南巡撫責成河北鎮道訓練士卒
聯絡鄉團於沿河一帶設立防守併嚴禁吏卒藉端滋事則河以
北聲威既壯該匪自不生窺伺之心矣是否有當謹附片具奏

通稟舉行鄉甲約文

祝 壇

敬稟者竊思保甲之法所以詰窩隱而除奸宄法至善焉雖然詰
窩隱莫先於勸善除奸宄莫先於化惡蓋以暗室之糾虔倍嚴三
尺使民之內訟較勝八刑任德則勝於任刑聽訟則不如無訟故
司教之救諫在所先司寇之詰奸在所後也壇於五年夏間甫抵

新鄉任會匪聚眾滋事幸賴憲威勦除盡絕閭邑又安竊計黎庶
猶病後之夫元氣大虧宜投補劑以救之而補救之方莫良於師
古而變通之如蘇軾所云藥雖進於醫手方多傳於古人也然則
師古變通者何方則師隣里鄉黨法變而通之曰鄉約仍與保甲
兼行之因名之曰鄉甲約夫隣里鄉黨始於周官其法五家爲比
使之相保以下士一人爲比長五比爲閭使之相愛以中士一人
爲閭胥四閭爲族使之相葬以上士一人爲族師五族爲黨使之
相救以下大夫一人爲黨正五黨爲州使之相調以中大夫一人
爲州長五州爲鄉使之相廩以卿一人爲鄉大夫其鄉大夫之所
司者則掌其鄉之政教禁令正月之吉受教於司徒退而頒之於
其鄉吏使各以教其所治以攷其德行察其道藝州長則掌其州
之教治政令之法正月之吉各屬其州之民而讀法以考其德行

道藝而勸之以糾其過惡而戒之若以歲時祭祀州社則屬其民而讀法亦如之春秋以禮會民而射於州序正歲則讀教法如初黨正則掌其黨之政令教誨及四時之孟月吉日則屬民而讀邦法以糾戒之春秋祭亦如之正歲屬民讀法而書其德行道藝族師則月吉屬民而讀邦法書其孝弟睦姻有學者春秋祭亦如之閭胥鈔凡春秋之祭祀役政喪紀之數聚衆庶既比則讀法書其敬敏任恤者此周官所定鄰里鄉黨及讀法之制其法至纖至悉其間有緒有條脈絡相連大小相制上施一令則朝出而夕行下達一情則聲呼而響應聖人之立法至周且備矣齊之軌里連鄉漢設亭長三老嗇夫版尹唐設里正坊正宋設保長者老明設老人皆庶幾周官遺意我朝以耆老主講約保長主保甲名雖異而法猶近於古而聖論十六條演說則易解而易行盡善而盡美較

古之三物五禮十二教尤詳備焉實爲化民成俗之要訓使民家誦戶曉心維力行必長善而救其失刑不試而民咸服則吏治蒸蒸日上不至於姦者固不在文網之密乎是之謂補救良方師周官而講聖諭卽所謂補救良藥也新邑城鄉計共三十六都衛每都選都約長都正各一人每衛選衛約長衛正各一人本都本衛中莊大者自立一約莊小者聯數庄爲一約每約舉一約長一里正本約中十家爲一牌舉一公正牌長其長正必擇家道殷實正直廉明衆所信服之紳衿不論舉貢生監舉應是責都長都正爲一部之鄉長尤當重其任以隆其體由縣印給執照以爲任使有志自愛之士不肯自棄於不材而見辱也每都再舉約副二人以助之每約再舉品行端方詞旨朗暢者二人爲約講司書記勸講諸務夫所謂都衛長正者卽周官之黨正也所謂約長里正者卽周官

之族師也所謂牌長者卽周官之比長閭胥也分而任之都衛各長與約長專司教化勸講事因謂之鄉約都衛各正與里正專司詰妖巡緝事因謂之保甲合而行之長正則和衷會辦勿許推委故謂之鄉甲此各鄉甲約之原委也各都各衛編造戶冊先書都衛約長都正衛正姓氏約長里正次之牌長又次之夫然後開列牌戶不論男婦老幼均列姓氏於冊內如有外出及探親寄住者亦須告知長正牌長另記一冊以備查每都衛中設一鄉約總所每約各設鄉約所一處屋院宜寬大中設香案供奉聖諭牌上則平列聖諭兩大字下書十六條演說每約各立紀善紀惡紀改過三簿約所門首仿申明亭制各懸彰善警惡二牌每月分期勸講兩次屆期都衛約長督同約長牌長會同都里各正按冊點齊牌戶率至約所序長幼別男女分班行禮畢牌長各舉本牌爲人善

惡約長質証詢明分別勸戒由約講對衆書之善惡簿約長擇其善多及大善者大書其名於彰善牌名下詳註善跡以示榮如有大惡及惡目多者大書其名於警惡牌名下詳註惡跡以示愧其或真能改過者書之改過簿並准洗除惡牌以予自新路此仿古之考德糾過也舉善惡畢約長高聲宣講聖諭兩條再將另開勸善警惡條目講說一遍緣方言俚語明白易知使村僻小民咸知勸懲從此按期勸講旌淑別慝彰善瘴惡善知勸而惡知恥耳濡目染日異月新可睹一追同風之化耳此仿古之讀法也其名書警惡牌者每期令其跪於中庭俯伏聽講使萌恥格之心每講約三期簿呈懸約一次如有曆著大善者由縣從優獎勵若有爲惡多端約長勸戒不悛者傳同長正牌長人証質究明確輕則薄責示儆重則照例嚴辦所謂教之不改而後誅之乎該長正等近在

一方易周耳目視閭鄉之事如運掌上爲之易力而鄉曲之近衆所昭彰當亦好惡公而不敢任情以自恣倘有藉公濟私武斷戾俗者則衆目所視衆手所指勢必羣起而攻之似無慮其徇私耳大抵民之不能移風易俗者皆以上情欲達於下而一口不能家傳戶說下情欲達於上而一身不能躬親遍曆故也今行鄉甲之法使上教行於下下情輸於上治萬家如一室治億庶如一身上下相維臂指相使則固禁無不止令無不行矣此變通周官因地制宜舉行鄉約之原委也夫鄉約之行以教民爲首務原期民有自訟之法則不必伏棘木之下而翕然從風矣然而境屬衝途難免外來之賊賢愚不一恐多怙惡之徒亦宜防患於未然庶保良民之安枕故與保甲兼而行之焉保甲之要有三責成都里各正會同地方牌長督率牌戶認真辦理其所謂三要者一曰勤守望

分庄鎮大小每夕酌出壯丁輪流巡更聞警則連擊更鑼以爲號
各牌戶留半守家半赴救護隣近各庄亦在各要路掩伏截拏獲
賊送縣給賞如失救應分別責懲若遇火災亦宜出而救援坐視
者責之一日詰奸暴牌戶中如有心非口是陽奉陰違者或藏盜
窩娼或結匪聚賭或以鼠牙而誣控或因雀角而行兇或弄刀筆
以爲能憑空唆訟或升高陵以窺伺攫取人財此皆奸民暴客小
人之尤不待教而誅者也尙可優容而主藏之乎該都里各正牌
長四鄰會同都長約長據實稟縣究辦倘有外來面生可疑之人
亦卽盤獲送究若容隱不稟由縣訪聞或別經發覺牌長四鄰一
併治罪都里各正革責示儆一日懷遠人新邑爲西南大道行旅
往來不絕倘被綠林之客或鑽穴隙以相窺乘間草竊或伏草莽
以察伺攘奪資財則負置揭篋擔囊而趨者該店主及附近各庄

村都里各正牌長人等隨時率同牌戶齊出救捕獲賊重賞失察
併究此兼行保甲之原委也夫鄉約以興民之善春之溫也保甲
以詰民之奸秋之肅也秋肅春溫相嬗以成物德禮刑政相濟以
和民境舉行鄉甲以後留心察訪各長正核訟牒之多寡以徵排
解之功驗賭盜之有無以觀稽查之效循行田里閱其農事之興
采訪風謠課其化民之俗果能實力奉行勸講有效由縣式廬表
閭獎勵優加其有公報私仇任情誣捏或辦理不善未服衆心或
視爲具文始勤終怠或武斷鄉曲滋擾良民者許約長牌戶聯名
具稟察實輕則撤退另補重則加等治罪計自舉行至今已逾四
載矣雖萬民之衆百里之寬良莠莫齊固未能人盡善人里皆善
里然訪察輿情一經跡著惡牌衆戶皆以爲恥名登善簿閭鄉咸
以爲榮以是父母戒其子女兄嫂戒其弟妹勿作惡爲衆所戮笑

此則遷善改過之明驗至若訟獄固不能無較前亦少各安執業
乏游手而好閑歲旱民窮猶完糧之竭力夫如是則如醫用補救
之良方良藥已經投效於世間似可令病者之久服而益補亦可
用醫者之遇病試方也顧此乃境分所應辦之事何足以上瀆憲
聰茲因奉調交卸各都長正牌長衆戶人等各以鄉甲之行著有
成效久恐廢弛盡棄前功紛紛籲請轉稟立案前來謹將變通古
法舉行鄉甲約由覲縷稟陳鑒核並附刊行章程一本上呈憲覽
伏乞恩准批示立案俾新邑官民永遠循行將見人享平康之福
里興仁讓之風皆蒙大德成全永感無既矣

河北道批

昔周制比閭族黨自長正以至鄉大夫皆所以掌其政教禁令而
考其德行道藝王政莫善於此後世保甲之名緣此而起迄於宋

王安石祖周官而誤用之始任以捕盜賊繼命以習武事又責以督催科民實不勝其擾矣該令仿周官隣里鄉黨之法變通盡利因地盡宜於每都衛中舉都衛約長都正衛正每約舉一約長一里正十家舉一牌長曰長所以司教化曰正所以司糾察並舉約副以資襄助另舉約講專司書記勸講諸務凡此求所以治民者不外爲善去惡兩途而已每約設立紀善紀惡紀改過三簿並懸彰善警惡二牌按月分期各長正率同牌戶人等齊集公所由牌長舉發人之善惡分記簿中大書牌上以申勸戒其有過能改者亦准登簿除牌子以自新善惡簿按期呈縣查核分別旌獎究治是仿古之考德糾過一一見諸行事人人有所觀感並在公所約長宣講聖諭使之家諭戶曉改過遷善是仿古之月吉讀法易於遵從且於鄉約之中兼行保甲各牌戶稽查奸宄莫不守望相助

庶可弭內患而禦外侮查閱刊本章程條分縷晰備極周詳賢令尹學古入官本經術爲治術視一邑如一家意美法良誠不多覯現據另稟倡捐經費加增書院膏火添設城鄉義學更有以作育人材振興文教似此實心實政勤求上理仿之古循良吏又何多讓焉惟既稱行之著有明效務在久道而化成仰衛輝府卽飭現任新鄉縣責成各都衛長正率同約長里正人等遵照章程實力奉行由該縣認真考察善惡分別勸懲以正人心而勵風化慎勿視爲迂闊厭其煩瑣致令日久廢弛是所厚望

徵新鄉縣文獻啟

韓邦字蓬萊人

岫嶠蝌篆成疏鑿於玉書沛泗龍飛識險要於金匱景純山海之註當搜陳編亭林利病之錄詎容杜撰是故琳珎著述悉假瑯嬛圖籍迺免鄉壁虛造之患無可辯者矧夫郡國圖書爲地

方文明所孳乳其閒疆域沿革賦徭始末人物土產風俗民情
典章藝文忠孝貞烈諸大端雅非單腋能合裘端資聚碎以製
錦斷瓦頽垣深陵高谷間當有散帙宛在者矣新鄉地扼河朔
號存鄜舊羣生澍濡碩士蘊藉洵文明都會也而近且輪軌縱
橫往來莫阻郵筒羅布消息易通將來文明促進計可拭目俟
之惟惜晉乘漫漶尙待董狐良史直同魯書沉淪須繼獲麟絕
筆清初修經三次指屈業逾百年蘭臺石室之存能無望於司
徒哉余百務縈心三餘鮮暇吹竽已涇汲綆不修詎復敢以斯
文自詭顧念數典考禮實裨名教用思旁搜遠紹博徵文獻或
材堪職方陳輿圖而瞭若觀火或利析泉府辨稅源而清如列
眉或爲鄉賢大夫寘能遂以獻書或稱博物君子辨產悉以著
論或仿輶軒之採陋巷無任其隱或博瑯琊之句文苑弗聽其

缺或樂攷古以存憲或喜旌節以闡幽賦成擲來便作金石唾
餘化去皆生珠玉泱泱大國風定續邱索之有人歸歸靈光殿
詎儕杞宋之無徵鼎立三十六社應循遺規以保粹籌計百八
十年當多軼事以增華如其蜀紙可得曷虞造樓無助果爾魯
生肯出莫疑定儀有缺鴻文就而風雨驚駿業成而鬼神泣斯
亦日月之秀色山川之輝光也茲拋瓦以引玉願買積而還珠
書俟校正青藜杖當然相照章同急就黃門令庶幾早作爰付
棗梨宏一時之巨典藏如珍璣斯千載之不朽

新鄉縣徵文獻啟

田芸生

粵稽山川既奠壤賦成神禹之書文獻無徵杞宋遺宣尼之憾
故方策可以觀政端在蒐存圖書可以經邦不遺偏僻禮失而
求諸野史缺而徵於鄉邑乘之修不綦重乎吾新爲冀州分域

鄜國名區伐產瑰竒俗稱敦樸明季始成舊志前徽之缺失已多清初三屆續修中葉之簡編忽斷迄未重加搜輯今且百有餘年慨泥檢之銷沈已星移而物換欲網羅夫散失又代遠而年湮况值政尙維新迭更滄桑之變誰知人惟求舊猶向陵谷之間何幸縣長韓公鶴亭烏臨下邑琴奏和聲與民休息之餘有志修明之業覽蠹遺之殘帙惟恐塵銷剔蟾蝕之幽光亟思玉琢擬拾遺而補闕不令碎錦之久湮將振靡而式浮藉挽狂瀾於既倒爰集諸紳分任其事共襄盛舉聿觀厥成諒此廣廈衆材不吝芻蕘之采必能鴻文鉅製益增桑梓之光遙遙百八十年風雲迭經變幻鼎鼎三十六社金石尙可搜求故家每有藏書名宿不無載筆或熟於掌故或工於心銘或得之傳聞或有所考據無論天文地理戶口賦役人物藝文風俗祥異之類

凡有關於志乘之紀述者不妨瓊屑之紛投用助瑤函之彙集
舊唐書雖多繁猥蒐採無遺新蜀志亦有舛訛贊修是賴莫遽
謂稗官野錄不足應太史之旁徵但無令劍晦鼎淪即可副賢
侯之厚望

著述

寒窗草明諸生李允端著共五卷僅存其一

邑人郭蕙波序丙午春暮顯翁李太親家攜其六世祖避囂子遺書一卷示余名曰寒窗草余受而讀之見其述志論驚夢篇與疾世問天天答勸善指南車黜邪崇正等篇皆不求仕進不貪祿利毅然守正不墮流俗之言洵草野中之經濟勝過軒窻遠矣豈古隱君子之流歟不然何獨善猶不忘兼善之心歟按公係前明諸生諱允端字正之避囂子乃其別號也五歲入小學八歲即能解四書大意不幸少孤小祥喪母嫡母楊親司衣被出令人隨歸必問其所事就學十年二十二歲遊泮崇禎甲申流寇猖獗衆皆避難而公獨扶母柩痛哭寇兵三過其門不入其室豈有鬼神爲之呵護抑寇亦感其孝而釋之皆未可知

八月大兵復至人皆喪膽而公仍守樞無故九月殯母凡所當盡之情無不周至迨國朝定鼎年二十七歲卽不應試隱於隴畝吟嘯終身嗚呼觀此亦可以見公之行識公之志矣書凡五卷意必有通權達變之才利物濟時之術惜乎失傳唯剩其一斯亦碩果僅存也已

三劉文集劉源潔劉源淵劉孳撰

邑人殷元福序昔劉原父兄弟叔姪皆以文名其行誼端方亦畧相當世號三劉同時歐陽永叔稱一代宗匠獨推服劉氏而原父且有歐陽九不讀書之嗤噫此豈非閒氣所鍾哉乃今卒業吾邑劉氏家集知古今未始不相及也進士之文廣而淵司訓之文醇而穆茂才之文充實而條達皆卓然成一家言何其盛也若進士棄榮如遺而高臥丘園司訓學宗程朱坐言起行

茂才雖困諸生而落落自賞險易如一又足爲兩從父後勁噫
此豈非閒氣所鍾由宋而昭代又一見哉予司訓先生門人也
成童夙親進士懿範而茂才與予爲金石交故樂而彙敘之以
爲三劉集云

詩柄要覽易經卦解孟之哲撰

秋桂堂詩稿懷喬日記陽宅存是地理存是孟天馥撰

敬齋集郭汝靖撰

冷香吟一卷學步草四卷暢俊撰

令節編珠雅謔漫鈔童蒙砭語朱陸王學考智囊集雲菴雜著四
書正韻詩書易正韻槐齋偶憶三卷郭堧撰

槐齋偶憶自敘新中於勝國時爲河朔文獻之邦二百餘年於
茲矣而余生獨晚豈非命哉且余質至蠢愚每妄希古人年未

及冠承先人庭訓文理稍漸成章即不欲以時藝自廢偶得古
本無問經史子籍必一一窮覽終而後已不然雖寢食不快也
及爲諸生每受知當代諸大人頗致虛聲然余方銳意博觀雖
功名進取之計畧不措意又自以先人嚴訓時懼失墜往往不
揣謏陋欲直行已志庶幾不戾古人自是以筆墨丹鉛爲性命
此外了不一與也然家貧無計得購羣籍而是時吾族先宗伯
大參兩公之遺書尙在及吾鄉先達名門鄴架書厨頗稱完聚
時時假借省覽如得重寶有愜心者即倣葛洪王筠手自抄撮
無間寒暑樂此不疲因自嘆前賢之餉余小子爲甚厚而幸余
生之猶未晚也計經余目涉者無慮數萬卷繼此館穀四方亦
時得見所未見益自信此生之未爲不幸也而其中不無遺義
有爲古人所未經摘發而不當余心者志之不忘以待商析於

今菀積久矣乃數十年來駒隙迅邁人事隨之吾鄉名族之後
日即消亡向之古籍曾供余博涉者蕩然一空而余髮亦如此
種種墓木且拱矣回思所得與年俱去遺忘者十之六七焉嗚
呼余敢忘前賢之厚賜耶每一念至不勝凄其因急搜棄失之
餘千百中僅有存焉隨筆紀錄以示後學亦曰此所得於先人
之訓與吾鄉先達之玉余於成者而未之敢忘也云爾

讀郭華陽先生槐齋偶憶一卷反覆玩味知先生之於經史詩
文深有體會無滑口讀過者益歎先輩讀書皆躬行實踐非後
來舉業家所能及也博洽淹通而不屑進取艱苦卓越而甘守
迂愚僅一教職未獲展布至于計典而歸冷落林泉嘯傲風月
絕無措意於榮辱得失間冥冥鴻飛誠可望而不可即哉其言
曰傳家以忠厚爲基處世惟謙恭可法至今猶想見其人高山

景行心嚮往之矣田芸生跋

詩鈔一卷益夫詩草附郭兩銘撰

珠囊記數郭虎撰

秋鴻堂小草張應葵撰

自序秋鴻堂軒名也軒胡爲以秋鴻名余自幼爲要子時於四序獨羨秋於庶類獨愛鴻每當爽氣侵階涼風入律玉簪綻蕊金菊流香於俯察品類外仰觀大化見夫橫空旅雁出塞依山帶月隨雲聲聲嘹唳快然樂之因以名吾軒從所好也隨筆云者蓋不假思索不費沉吟任意揮洒舒卷自若之謂也夫文人韵事宜刻骨鏤心精思大力鎔鑄而成而可任意爲之乎乃余於文事往往不思而就思則反窘載思之遂無隻字自昔學步時而已然矣毋亦天資浮薄之故歟余幾不自解茲亦不求甚

解舉凡詩文箋啟不限格調不拘片段興至則書興盡則止間有詩或五七字而成完句者文或承破小講及單比散行一段者他如箋啟等輒隨筆誌之亦不欲沒其興會耳古有大手筆大方家吾則何敢特自名爲小草云

課心約編隨筆小草合集二卷張應棻撰

安陽張鳳臺序民國四年十二月張君紹平攜其太高祖蘭圃先生課心約編暨隨筆小草合集囑爲弁言鳳因荒於學久矣卒卒久不報旋迫於厚田先生之請未敢固辭盟誦數過嚮往維殷新鄉向多儒宿明清之際孫夏峯講學蘇門中州士大夫負笈而從學者以新鄉爲最如七郭駭臣駭臣治化景暉承休景暉瑛

三張

瑛璘欲翁

二段

廷珩四知

二劉

若武擊樞

以及尙威如杜晉卿楊

泰徵孫瓚緒諸公皆先後執贄於夏峯之門以故邨鄰之間曆

數十年而絃誦不絕猶有鄉賢之遺風焉蘭圃先生雖未能親
炙門牆其平生讀書養氣講學立言殆亦聞風而起者歟鳳嘗
讀夏峯詩云經綸到手爲指點燮理隨心自主張是絕大經綸
主張皆在一心也其示同人詩云學問要從躬上得文辭璀璨
總浮塵是蓋世文章皆由躬行實踐中來也今蘭圃先生凡事
以課心爲主固已得爲學之主腦一切詩文箋啟序跋疏引概
不計聲調法律祇以發抒性靈爲宗旨世所謂篤行君子者先
生其庶幾乎子輿氏之言曰學問之道無他求其放心而已矣
課之云者即求之之謂也放心既收則學問之真髓在是矣至
文詞之長短工拙猶其末焉者耳紹平父子堂構增輝而又能
紹衣舊德闢發幽光斯亦蘭圃先生之遺澤所流傳於奕禩者
深且遠也鮒生不才姑綴質言以誌景仰之志云

自序吾友蘇門漁老凡生平著作皆筆於簡隻字不遺不知者
往往笑之謂偶爾彙集妄希行世余獨喟然曰斯固有心人未
可厚非也我輩置身儒林卽事盡可收心隨時皆宜自課倘去
年偶作今歲遺之茲日得句來朝失之將功課之疎密學問之
消長不幾藐無印証耶余竊羨漁老故事欲步後塵因疎懶究
未竟歲丙戌孟夏之三日徙居城北張門邨構一小軒軒旁桐
陰方茂賴以清暑自號碧梧居爲課子內室講習之餘景愈暇
外念不紛仍恐此心泛無所用故凡有感觸輒勉力成一小局
並不敢仍疎懶舊習聽其散遺乃自訂一頁舉詩序書啟等概
筆之並留時日名之曰課心約編蓋亦卽事收心隨時自課之
術也倘斯世有道君子不察愚衷而笑之漁老其謂我何

蓮亭詩草一卷張應棻撰

自序人莫不有其性之所近性近乎此則慕乎此性近乎彼則慕乎彼大抵然也余本不能詩者性亦弗與之近而心則慕之慕之甚遂願學焉因於李杜諸名家詩中取其明顯易曉者若干首讀之奈無人指示余雖有志步趨亦猶正牆面而立也則其志亦無由而申歲丙寅余外祖逸羣暢公南遊歸里余往省之請安外侍立几旁敬領教誨久之偶論及詩余甚喜公遂將入門規矩始終畢告至是余始知詩有字法有句法有篇法有對偶有意有氣有起束有結構有平仄背靠押韻以及古風五言六言七言絕句律詩排律諸大畧然乍聆之猶未深知也厥後每於讀書暇輒往聽其指示越二載餘遂殷然有學步之思焉或松間月下或飲酒賞花即景生情勉湊成句呈公改正公亦不嫌鄙俚曲爲斧削余竊私心喜曰有公在而吾學詩之志

庶因之而可成矣甲戌春公赴京會試每詩成無人改正時爲
憾之然猶冀其來也孰意五月初旬抱病歸家歷月餘而卒嗚
呼公死而余作詩之志亦與公而俱亡矣其後雖有暇時惟於
二三兄弟休息於西園蓮亭闕則高歌樂則暢飲昨歲春仲適
值水仙盛開邀賓共賞時有余表伯象九趙君在坐酒酣後遂
吟一絕以賞之余玩其詩見其天才穎異有振衣千仞俯視塵
埃之概余又私心自喜以爲推敲有人庶可繼余外祖暢公而
克終余願也今歲榴月表伯向余曰汝之詩成集否余曰未也
表伯再三命余詳抄且曰汝詩成集願爲子序余於是敬謹不
違遂集成於西園蓮亭因名之曰蓮亭詩草

椿楸園存意俚言集各一卷郭新邦撰

迷津普渡一卷衛大壯輯

藝語誌畧一卷衛大壯撰

林慮王有雋序詩與文皆本乎性情者也欲爲之而不能自發其性情不足以言詩文既爲之而不能使人共發其性情亦不足以言詩文鄺南衛健齋先生年弱冠由弟子員補博士肄業成均遂授司鐸凡所施爲嘗能人之所不能當道亟爲汲引多以他故未就桂萼歲月垂四十餘年然所至有聲人爭敬焉亦所以報也道光丙戌推任歸德府教授與余同舟者數年見其立心制行應事接物無一不善而猶未知其優於斯也辛卯春始出其所存若干作大抵洗盡鉛華純任本色與世之吟風弄月琢句修辭者判若霄壤讀是集可以想見其人並可想見其品之粹殆所謂自發其性情而又能使人共發其性情者歟名之曰藝語果藝語乎哉

自序凡人有所獨好而後能樂此不疲久久不厭而後能任筆所之無不如志余與此道相隔如萬重山且又拋荒有年從不操管卽不得已應酬亦不過草草塞責尙何足云辛卯春以心緒欠佳時常鬱結署之比鄰卽郭氏刻字所伊亦常相往還因其便遂將所存之稿一爲剞劂其間雖經魯齋兄批閱或者因阿好而爲欸語未足爲憑唯是碎磚片瓦公然禍鬻災梨豈不可笑然此舉特遺悶耳其他弗計也顏曰嚳語則癡人夢話尙得以尺寸繩之哉

附嚳語誌畧一卷郭文貞女史著

自序余幼侍庭訓每見筆硯及古人詞章輒愛玩之不釋手稍長見十四兄渲染絹素心竊慕之偶一摹倣不敢示於人乾隆壬子隨夫任至固陵佐中饋習針黹而學詩學畫之意漸廢嘉

慶戊辰至菊潭縣署女公子汪吉衣嘗以詞章見投不獲已十
答四五未能工亦不求工也道光丙戌至睢陽郡承宋太恭人
垂顧又以女公子宋竹芳雅嗜染翰因於太恭人壽日勉繪壽
屏二幅從此索者累累欲藏拙不能也邇來眼漸花氣血日漸
衰不惟詩久擱筆卽畫亦成苦境矣癸巳秋初夫子命鑄鑿語
誌畧兒子自強綴此冊附刻之余故敘其顛末以見生平之所
經歷者如此敢謂敝帚堪享不忍廢棄也

葭草吟左傳分國郭宗楷撰

菊莊詩文稿日記錄郭祥椿撰

易經頂批社世田撰

居家庸言靜樂園集趙珂撰

黔南周際華趙鳴玉居家庸言序子思子作中庸一書中而系

之以庸其義彌天蓋地而其實不出於尋常日用之間如布帛菽粟人所易知即人所共能者也知之而不行行之而不篤遂使至近之理視爲至遠至實之事視爲至虛至易之禮視爲至難背道而馳苟且自便是所謂爲道而遠人非惟不可爲道並不可爲人矣頃於靜樂園中與鳴玉丈人相往復聆其言論風旨頗得古儒者氣象談次出其所著居家庸言兩冊屬訂並屬弁言受而閱之或獨據剝見或引據陳言大要以執禮爲務而分其條目於冠婚喪葬之交用以示訓子孫納身軌物毋使越禮而已其論讀書之法必期於明理古人謂先器識而後文藝洵爲有本之言尤喜其約而能該曲而有直體非深得此中真際必不能言之清切如此嗟乎自學者從事俗學卽爲俗所累此事遂廢不講久矣其所謂讀書者不求明理祇於八股文求

文而八股文又祇據拾前人濫套妄希青紫之榮而孝弟忠信禮義廉恥竟不知爲何事其所謂居家者非尙刻覈卽尙侈靡飾智驚愚千名犯義至爲士君子所不齒而恬然不以爲怪是安得取此庸言盡斯人而告之也予舊作省心錄百餘條亦大懼子弟之狃於積習貢於非幾故敬述先大夫之遺訓証以我生之閱歷偶有體會梓而存之俾老輩各置案頭以備觀省而卽以之爲自課之計云爾今閱是編幸有同心非僅趙氏子若孫所宜取則推而廣之其有裨於世道人心者不少深願覩斯冊者切勿視爲老生常談庶幾是訓是行卽可不僭不忒以禮制身以理治心求文章於道德當不徒在言語文字之末矣是爲序

筆談二卷蔽社鄉談一卷蔽社瑣談一卷三字鑑一卷張時中撰
三字鑑自敘昔宋司馬溫公奉旨作通鑑奏請劉道原爲助道
原因通鑑而作外紀稱宏博矣朱子因通鑑爲綱目書法一本
春秋爲萬世法而顧亭林謂其未識溫公之意豈非以有益實
用者概從刪削歟然閱者猶尠能終卷甚者束之高閣徒以壯
觀惟王伯厚三字經人人稱爲小綱鑑余亦舉以訓幼學至問
其世系之源流余茫然無以應也因卽三字經而推衍之三代
以上加詳事始物原纖細必註三代以下從畧亦不作三代以
下人不作三代以下語之意也本之綱鑑故名之曰鑑仿乎三
字經故曰三字鑑非敢以塵穢視聽亦聊備一時之遺忘云爾
拙齋漫談一卷郭祥瑞撰

邑人李雲杞序且夫夔牖繩樞之士讀書蕭寺斷齋畫粥十數

年其艱窘有令人隕涕者一旦掇巍科登顯仕其文章經濟閱歷湛深視僥倖得志者之所爲豈可同年語哉卽其公退之暇如書札筆記等文當必洞切時勢典瞻高華一日問世紙貴洛陽使其及身而傳或賴後嗣以傳俾顯氣英光不致海底永沉豈非快舉無如文章憎命時數限人先正著述或闒諸名山或墮於兵燹而匿跡銷聲者不可枚舉此亦文人之厄運也不禁三歎如吾邑郭玉六方伯一生歷史何其先後同揆若是哉公自釋褐後由諫垣而藩臬敷歷中外二十餘年除政績外間有著作六七種而拙齋漫談一書尤其膾炙人口者予生也晚惜未之見癸未春承公長君小六師囑設帳退思別墅課伊子讀中有醒息樓藏書甚夥獨此冊未曾寓目己丑冬將解館歛於殘紙堆中得一冊展閱之乃拙齋漫談墨跡舊稿也都三十餘

篇或有關風化或寓言勸懲牛鬼蛇神之誕譚天說劍之竒妙
諦精蘊皆不悖於危微之旨其精神有不可磨滅者卽擬付之
梨棗以公同好而家無儋石壯志未酬者三十一年庚申春山
左韓鶴亭縣長修志局開搜求遺書出此備証諸同人爭先快
觀僉謂有關世道之文湮沒不彰致前輩風流草木同腐豈非
吾人之憾事也哉商付石印俾此書流傳於江國海隅未必非
社會之一助也是爲序

先天圖淺說孟守先撰

五之堂詩文稿日日錄一卷郭祥棣撰

性理輯要日記錄王錫侯撰

零星詩詞草一卷章鳳樓撰

溢香齋詩草張子定撰

遁僧文集石竹齋詩集祛病吟翠竹山房詩集孟汝瓊撰

東遊日記一卷衛延齡著

邑人李雲杞序福者禍倚絕處逢生雖曰人事豈非天命哉夫
人十年讀書十年養氣蘧廬坐嘯自命不凡視取青紫如拾芥
耳詎知無妄之災突如其來將俾同舟諸人俱赴滄溟而死者
呼吸卒能鴻飛冥冥遠去弋人人耶天耶此吾同年友衛君紹
彭東遊日記之所由作也光緒二十六年庚子初夏衛君買舟
北上偕其弟紹夏應京兆試予亦附驥泊舟津門五日而拳禍
作五月十九日二鼓殘月朦朧愁雲慘澹拳匪率隊而南舟當
其衝登者多人河干拳隊如蟻擲香焚舟礮擊者三玻窗俱裂
瓦礫狼籍傷及趙僕諸同人搶攘萬狀苟延殘喘乃將入虎口
而慶再生者果誰之力與天也嗣後返棹而西沿途二千餘里

風聲鶴唳九死一生畫之所睹夜必書焉乃成日記一冊寶錄也旋里未十日而天津失未二十日而京師陷清帝蒙塵又十餘年滿清亡民國建此一役也所關甚鉅豈僅登山臨水率爾操觚已哉衛君天才敏捷文章雅麗此記未付梓而遽赴修文序之不禁潛潛淚下也

漫存集一卷覃懷吟草一卷日記批答一十二卷詩說一卷有不爲齋賦草一卷口吃集一卷王安瀾撰

口吃集自序予不能詩故於古近各體概乏吟咏恐爲之不似貽笑大雅也然古不云乎詩言志蓋人各有志因言以宣長言之不足故又詠歎之此詩所由作也然則詩無他言而已矣言無他志而已矣有志而言不工譬之喑啞予不能詩而終不吟詠是將終身喑啞也喑啞者之有所喜樂有所患苦已則不能

言人則不能喻反不如口吃者之艾艾期期尙能吐其胸中之
喜樂患苦而使人共喻也然則口吃雖易招人笑而其志固已
悉吐而無抑鬱不宣之苦矣况言輒招笑心必內慚心既知慚
口必漸改寢以久焉雖終不敢望善言者之簡明響快而艾艾
期期之足招人笑者必且逐漸加少口吃之病可漸輕矣是口
吃者但有懷欲吐則吐之不惟不必畏人笑且笑之者愈多而
於已愈益也甲午秋館於楊子和前輩家七月二十五日夜秋
雨浙瀝雜木葉而下淒淒切切觸緒增懷已就寢不能寐也因
思古人中心蘊結每借詩以宣之惜予不能詩也乃忽欲姑試
爲之輾轉伏枕卒成多首恐睡去輒忘也乃披衣起燃燈漫書
之比書出則又赧赧然慚其與古人大不相似也而忿然欲焚
之蓋恐見之者之掩口而笑也既而又憬然曰是不過言之不

工耳言之不工亦不過如口吃者之格格難吐耳口吃者不以人之笑之也而遂廢其言則予亦何必恐人之笑之也而遂廢其詩乎且言招笑必內慙內慙必漸改則吾口吃之病必漸輕今而後有懷欲吐則吐之不必畏人笑且愈幸笑者之多之足以益吾也因序而錄之名之曰口吃集

四書庭訓五卷張積芝著

夏峯孫尚容序先始祖徵君公著四書近旨一書先申明其大旨九世祖擔峯公著四書醒義一書復闡發其精義樹功聖門久刊行世鄰南宿儒厚田先生吾師也心關聖教志切童蒙將全部四書挨字逐句補以小註名曰四書庭訓爲童蒙捷徑作塾師指南當與近旨醒義二書並垂久遠尙幼時從師讀書與世弟善與同凡硯砥名礪行共仰高山詩禮並傳無分畛域自

日講訓鑑下背誦一字舛錯立加呵責教授之良無存出吾師
有者且吾師曾從事先祖徵君公日譜之校參素稱通家今
著此書益見學問之純功夫之實書成尚取而讀之才不敏何
敢贊一詞姑附數語以誌欽佩之誠云爾

香芍東匪記三卷張所撰

自序天下之事有大有小有常有變而處其事者有經有權形
形色色至不一端苟有可傳無以紀之則湮沒不彰矣顧或關
於天下國家之大或關乎身心性命之微文人學士爭相傳說
自無不嘖嘖焉稱道弗衰至若稗官小說所遇者細人所言者
細事村語俚言街談巷議縱皆實錄不加修飾而言之無文行
之不達豈足以鑿閱者之目而餒其心哉如予之香芍記是已
雖然咸豐十一年東匪之亂蔓延直魯豫三省之間蹂躪無數

村庄掠人財物姦人婦女虜人丁壯燒人房屋凡予所親見者
悉慘不忍言其未見者可知矣謂無與於天下國家者哉況予
一身所經歷始爲賊虜繼爲兵劫其顛於死者屢矣幸遇僧王
得見天日釋之令歸顧自其管中出零丁孤苦蹙蹙靡騁誰復
有哀其窮而處之善地者則予之吉凶仍未可知而藍袍夫婦
大發慈悲留住其家飲食與共無有軒輊此而不傳則人之善
不彰而汨人之善不爲彰使人人景仰而傳頌焉亦不足以對
天地質鬼神此又予身心性命所係也第以藍袍夫婦其人可
傳其事可傳惜予筆墨不足以傳之而余也亂離之後九死一
生親友見者輒必詢其顛末予因述之以手代口將藍袍夫婦
高天厚地之恩與夫僧王神武不殺之威從新感激一番且使
後世子孫知其祖父有此一大劫幸遇好人得以無恙而爲善

之心袖然以生則予之本意也又違慮言之不文哉藍袍者名維浙與予同姓予名錫所東人誤呼爲香芍姑妄應之即取以名此記云

邑人田芸生書香芍東匪記後連日閱香芍東匪記不能忍置誠以情真語摯節節苦難之狀能令閱者代爲欣戚笑啼不能自已也豈小說家務爲粧演者比哉然以是而知素患難行乎患難無容矯飾亦無可畏避得失之間福禍相倚伏焉特未遭事變之來人不能預覺耳忠信篤敬蠻貊之邦行矣此千古不易之理而星橋先生設身處地體驗得之並諄諄焉點醒斯人其有裨於世道人心亦非淺鮮豈止爲東匪記乎

耽嘔廬詩草周其昌撰

自序耽嘔廬胡爲而名也粵以余髫齡受書質樸薄弱中年失

怙運際速遭家遭兩番之劫掠僅贖青氍身經卅載之奔馳早
生華髮雪案窮經博得白面措大鐵硯磨日空餘黃蘗細辛三
下孫山之第草木成愁數鼓馮驩之歌風雲寡色飽侏儒而曼
倩啼饑畫無鹽而王嬙見詆慨嘆生平情何能已追維身世吾
末如何弗獲已而送退之之窮命薄而窮不我去乞宗元之巧
身拙而巧不我來於是江郎有怨楚客皆騷宋玉多愁文園善
病白眼阮生屢呈狂態青衫司馬半帶淚痕時而筑歌劍舞愬
坎壈於彼暮時而客嘲賔戲洩孤情於尺楮從此雌伏傲廬不
復雄飛大地矣然而咄咄書空竟以成怪鬱鬱居此慘不爲歡
遂致嘔心咯血紅墜唾壺遺患養癰命沉藥裏賴有醫國名手
療劉子之膏盲兼以傾蓋舊交規卜商於離索謂天地沙鷗曷
弗放開眼界矧身世萍梗奚堪緊縳眉峯前轍實後車之鑑既

改絃而更張熱火借冷水以消恍如夢而初覺築室西園安排
竹床茶竈棲身北牖羅列貝書牙籤洋洋乎天機活潑魚躍鳶
飛翩翩然逸致迴翔風光月霽社衆煩惱心卽到大歡喜地結
小蓬茆舍是最好安樂窩此耽啞廬之所由名也維時牕明几
靜襟爽慮澄主人之好事獨擅老子之清興不淺煮茗焚香自
饒佳趣栽花種竹別愜閑情假杯酒而淘塊壘醉後猶有餘歡
借山水以抒嘯歌胸中自鳴得意然則古往今來但付諸一笑
足矣事變物競又笑不可以一笑遣之芟恨鋤愁壑出天然樂
境陶情寓意證得靈府淵源遂乃驢背尋思奚囊貯句柑酒聽
鶯而擗辭銅鉢挑燈而聯韻鹿門煙樹固可供我流連朝川風
花洵堪助人諷詠雖詞雜俚鄙究無當於風騷而言吐中懷實
有關乎情性矧夫滄桑變革之秋塵劫兵火之後人居新樂地

號鄜南澗阿寶生碩人葦竹古多君子中有所貯默不能已情之所鬱發而爲辭兔園學賦不辭見笑陽春出雕寄吟還問著醜巴里昌以樗櫟棄材硯硠下品斧未經乎郢斲璞不雕乎玉人猥以消愁排悶自尋吾廬之樂敢思登梨壽竇妄邀身後之名然而覆醬故紙燒薪遺文雜肋未忍遽棄馬骨尙思求售倘其匠石采木不遺小草於山中或者中郎賞音誤收焦桐於爨下則北邙終古不沒已過之風煙做帶千金聊存一生之心血新纂百家姓氏草註一卷王銓堂著

邑人田芸生序南昌熊在渭先生新纂百家姓氏一編銘經鑄史點纂成章蓋仿梁周興嗣纂合千字文之例精心結撰情文俱美其餉遺童蒙佑啟其智慧者誠足多也惟逐字分疏摘錄古今氏族之較著者爲駢語以釋之而未著明其琢句之義轉

恐講演家有語焉不詳之憾不將與宋本百家姓同一不可索
解乎吾邑王紹心先生博洽淹通不求聞達而善誘生徒經史
餘暇輒就熊本逐句而梳櫛之詳加箋釋中有稍涉牽強者必
引伸其義使之融合於無間名之曰草註是不惟便於訓誨童
蒙也即熊氏纂合之本旨且得之而明辨以析矣周易得圖說
而益明大學得衍義而始備倘付之剞劂用廣流傳則讀是編
者得藉此而悉經史子集以及古今氏族譜是掇纂合者之遺
實拜箋註者之賜也豈第稱知姓字足供簿記已哉

停雲軒文集四卷寄興吟詩集一卷甯城爪痕集一卷梁苑爪痕
集一卷日記錄三十卷錯雜彈六卷田芸生著

秀綠軒詩草一卷李雲杞著

自序吾性嗜竒石家貧不能得每憶淵明醉石元章拜石暨吳

將軍輦石贈查伊璜心焉慕之輒託諸理想形於詩歌實則未嘗寓吾目也甲辰春得金川一笥五色斑斕約八尺許聞係張機部故物數易主而歸予喜而植之窗外護竹數竿晨夕清暇兀坐其間觀日中月中之影聽雨中風中之聲藉以醫俗藉以娛老因思東坡秀語奪山綠句低徊久之遂名其軒曰秀綠然豈敢妄自詡哉生不得志於時又不樂媚於世風雨遽廬雅好吟詠或直抒胸臆或因寄所託祇自鳴其豫耳對茲嶙峋之竒姿恨無崢嶸之峻筆豈敢妄自詡哉乃零星掇拾積數年而勞如潰薪爰命葉兒訂之名曰秀綠軒詩草自愧無屈宋艷班馬香有乖推誠曷敢問世惟家有敝帚不啻千金斯亦愚夫甕算得不受人揶揄被人胡盧乎如蒙陰壇大雅俯而教之黠石成金碑不付東海爲龍宮覆酒誣固鄙人之幸又非鄙人所敢望

也

志餘叶雅集一卷田蔭生著

自序士君子學古入官出而與人家國事淬有用之精神挺不朽之事業立德立功立言夙平尙矣否則不求聞達高尙其志登山臨水飲酒賦詩翛然有無懷葛天風亦足以振衰式靡廉頑而立懦然豈蔭之所敢知哉蔭生也晚不學無術又遭遇時變遂絕意進取以孝弟力田爲職志辛亥以還侍香圃家兄歸田里從事耕鑿漸學吟咏藉抒懷抱而隨時就正幾無日無之凡以道性情範身心消磨歲月而已詩云乎哉惟患者一得沾沾自喜傲帚千金念念不忘日來搜羅散帙得若干首彙爲一卷以修志餘暇捫苔掃葉弄月吟風又時有所掇拾類皆得之於家兄杖履間因名之曰志餘叶雅集置之家塾藉助童穉之

吟哦亦屬韻事若以巴人下里之音上擬白雪陽春之曲則非
蔭之所敢出也

新編東洋通志卷三

三

譜敘

任氏家譜 任氏世居關堤明末清初簪纓之族自文曄創爲族譜後歷經續修支派頗蕃

任璿家乘題言所貴乎修譜者非特以著世次紀官位而誇於人也蓋將使後世觀之而考世德之醇疵明流澤之廣狹而益思所以自立云爾故爲常人之子孫非難而爲賢者之子孫難也夫嚴烝嘗守隴墓保上世之所傳以自立於閭里常人能是亦足矣而繼賢人之門者則不然行焉必端也言焉必信也學必求其明理而才必期於通世也飭躬制行以自立於無過僅得比他人焉少有所瑕人即指之亦何以卓然於士君子之後而無忝也哉吾宗自山右詔遷以來圖牒散亡吾父司李公重輯所知以示將來其自德祖而下世系秩然宗支不紊德行文

章無少遺忘嗚呼可謂備矣念吾宗家世躬耕吾祖茂才公以
儒術顯事孀母而志苦行卓處亂世而知幾全真吾族人稍有
不率輒惕然曰無使吾茂才公知也吾叔祖郡庠公質樸有古
人風乃若吾伯孝廉公中夷淡定吾父司李公莊毅嚴恪識者
方之程氏二子良非虛矣吾儕承先人之緒而守耕讀之家風
苟使忠厚之意自我而泯雍睦之風自我而乖則雖享大名顯
當代恐終爲祖宗之所羞稱而不慊其爲人夫吾祖父或以伏
處而老或以違俗而去雖不獲大富貴於時然至今尊仰思慕
愈久而益隆其後人猶能嗣詩書之傳而博科名於當世則吾
儕何不師祖父之善以自立於士君子之林乎有君子而無祿
位族雖衰猶盛也祿位光榮而君子無聞焉族雖盛猶衰也噫
此司李公譜族之深心而亦余小子今日續而輯之之微意也

後有興者亦思無忝於賢者之子孫而可哉

郭氏族譜 郭氏爲邑望族至忠節公而益大始創譜康熙間遇
熙培遠修之嘉慶道光同治光緒間兩銘彥昭宗棻雲燦等續修
民國四年荃階慶雲等又續修之

郭雲燦重修族譜序譜之修善矣否則前人之嘉言懿行無以
表揚於在昔而精神命脉亦無以遞及於將來所以縉紳之族
士庶之家莫不有譜凡以綿世澤振家聲者皆肇於此也而獨
我王政公從陽之修實爲他人所不及將所謂創久大之規者
非耶統計十三卷縷析條分秩然明備其精神命脉所在足以
默化潛移者不少豈故鋪張揚厲以炫先世者哉至於一人一
事一言一詞不敢有一毫濫濫信乎一字之褒榮於華袞一詞
之貶嚴如斧鉞益見所關非淺也惜永城公東都之修以力不

足道光乙巳又因公費不給僅詳世紀嗟夫百餘年來兩次重修止刻世紀一卷不惟舊譜日久無徵第恐後起者因陋就簡以止詳世紀爲例則先世之苦心孤詣不將泯沒而不彰乎烏乎可春初八堂叔以修譜之事命雲雲雖不敏亦何敢違乃遍訪王政公舊譜僅得一二部又且斷簡殘篇不禁望洋而歎前人之所創誠後人之所難無感乎僅詳世紀也遂不辭勞怨勉從事自春徂冬無閒寒暑於十三卷中刪去世系爲其有世紀也并刪居宅爲其繁而難遍也補入家課爲正卷共十二卷曰世紀重一本也曰祠堂崇廟制也曰瑩兆識邱壟也曰家規嚴教訓也曰家課勤職業也曰誥勅昭寵榮也曰志表揚先德也曰世傳重實行也曰宦蹟肅官箴也曰鄉賢驗家修也曰藝文勵厥學也曰詩賦言其志也皆所以束身心於無形欲後人

之相觀而善也。至如生配卒塋務求其詳爵秩功名必核其實增光門閭者則表之有玷家聲者則黜之凜凜乎如春秋之嚴豈曰譜乎哉。夫於萬無可刪之下僅刻十之一二如管窺豹畧見一斑而已。兩易梓人兼之公費不給族賢又復集腋乃克成帙。愈見修之不易矣。若夫盡善盡美毫髮無憾請還俟夫賢且能者。

杜氏族譜 小冀杜氏久稱繁盛乾隆間杜超羣始創族譜嘉慶道光同治光緒間繼程來輅世重來錫等續修民國八年常相常立又續修之。

杜來錫序吾杜氏族譜自道光己亥重修以來迄今又閱數十年矣憶前次修譜時錫以諸生家居得與聞其事一自通籍後官京師不獲與族中父老長幼相晤者十有餘年今夏讀父來

諭以舊譜重修後三十年來生齒日增科名疊起且連年兵燹之餘不無遷徙流寓慮譜事之久而就湮也邀同族人重訂而增修之命錫敘其事以綴簡末錫竊謂族譜之修非止序支派稽里居詳輩數之謂將欲使族人共切木本水源之思情相親誼相聯勸善規過耦聚無猜乃足以上慰祖宗之靈下垂子孫之法溯吾始祖遷自洪洞數百年於茲矣瓜瓞綿延生齒繁昌累世簪纓勿替近十數年中又復科甲聯翩官內外登賢書者相望接踵是皆數百年來祖德宗功積之厚而發之光有以啟後人騰茂實而蜚英聲者也然則爲後人者正當於此時益切敦宗睦族之誼勿忘水源木本之思善則相勸過則相規不生嫌隙不起忿爭俾士農工商各安其職而二三磊落英多之彥尤宜互相觀摩奮志鵬程蔚爲國器俾吾杜氏不失爲世家大

族焉則此次譜事之修所厚望於族人者又何有窮期哉

杜常立序都家而成邑都邑而成國國有史典章備焉家有譜
昭穆序焉自來文獻所在未有漫無紀載而能貞諸久遠者我
杜氏始居萬年繼至中牟後又由洪洞遷鄘南之小冀鎮聚族
而居所以保世茲大者數百年於茲矣乾隆庚辰族祖心抑公
創爲是譜迄壬子重修定爲十年一舉義例周詳簡而易行厥
後歷次纂修奉行不忘雖間有水旱兵荒或致愆期然事定仍
復舉行所以繼志述事示不忘也歲己未立忝列代議士寓汴
議會族人以修譜期迫按門分支詳所自出居數月彙錄成帙
郵致立命審定且囑綴數言誌其畧立惟譜事緣起前人序之
詳矣勿庸贅按期纂述悉遵先人成法更勿庸贅一詞雖然閱
世生人閱人成世今之世不同於古吾之所欲與族人言者意

猶有進共和世代夢想大同驚高論者輒呼四萬萬同胞競相號召而其處鄉黨間或以儇薄稱或以悍逆著其人其名致爲父老子弟所唾棄本實先撥貽譖牒羞矣吾以爲匡四海不若聯一本協萬邦必先睦九族由吾身而上溯之旁參之兄與弟吾同胞也吾之從兄弟其父與吾父亦同胞也吾之再從兄弟其祖與吾祖亦同胞也推之五服以外九族以內其先皆吾高曾之同胞皆吾高曾以上之同胞凡支派之所分大宗小宗之所判其初皆由同胞始同胞在是何待他求自今以往凡譜申列名之人父與父言慈子與子言孝兄與兄言友弟與弟言恭朝夕聚處藹然如父子家人之相親而後可告無罪於先人然而人同此心心同此理吾親吾愛之人孰不自愛其親吾祖吾敬之人孰不各敬其祖敬愛始於一人施於百姓終於四海所

謂大同之化如是而已老吾老以及人之老幼吾幼以及人之幼家族主義卽社會主義社會主義卽國家主義天下一家也中國一人也觀於鄉知王道之易不出家而成教於國斯譜之修所關者重矣豈僅誌家門之鼎盛敘子姓之繁昌云爾哉

張氏族譜 張氏世居宋佛支派繁衍至坦公而益著順治間欲含始創族譜乾隆嘉慶同治間資漢昭宣時中等續修民國五年積芝子常又續修之

黎陽劉至東序從來世族大家所以別於小姓者非惟支派之繁衍冠裳之彙萃人莫之及也蓋詩書之訓禮義之教口傳耳熟相習成風言動舉止皆儼然士林中人而非俗鄙者所能彷彿也文運之所以日興功名之所以日隆者亦非爲家庭教授自有良法蓋由祖宗之德澤培植深厚是以秀靈之氣鍾於子

孫率皆天資穎異而性地純良廟堂器宇累世不乏此所謂積善之家必有餘慶非人力之所能強也余成童時從眉永先生遊先生昆季古道敦崇自堪景仰卽諸世兄輩亦皆典雅溫柔翩翩有風致如玉謝子弟爾時固已心醉而所爲世德作求者猶未識其詳也嘉慶戊寅寓硯新樂先生族姪獻曝增修舊譜而俾余爲序乃得悉心披覽見其世系之列爵秩之榮綸綍之華嘉言懿行之紀載粲然俱備於以歎爲後嗣者之善繼善述而張氏一門尤爲世族大家其源遠而流長者固大有在也考厥先代十世以上未曾顯達然多以耆德爲鄉飲大賓則門第品望已久重於一邑十一世後登科第列仕籍者纍纍司馬公才猷勲業著於有明之季尤爲傑出不羣其餘隱德高風標諸閭里文章著述行諸世宙以及賢媛節孝被旌獎入郡志者指

不勝屈倘非詩書禮義習染而成家風其能如是耶非其先世忠厚之德敦龐之氣積蓄深久其能一旦崛起寔昌寔熾以綿延於不已耶天下後世睹斯譜者當思創業垂統求爲可繼積德累仁奕葉必蒙其庥於所載嘉言懿行炳然而煥然者無一不是則是傲以私淑自艾卽獻曝所定家規亦皆奉爲楷式遵而行之則斯譜之作且有裨於世道人心家乘也而不啻國史矣

朱氏族譜 朱氏本合河鎮巨族乾隆二十五年朱彥儀創修族譜並著書香錄序道光緒間朱杲燮元等迭次續修

朱彥儀序族有譜何所以辨支派明遠邇示親睦也其體制肇自歐陽承叔後世名家多仿之蓋族大無譜不惟代遠年湮無以溯其本源將必同姓聯宗他年冒爲一派異族承祧後日誤

稱本支則宗法紊矣非所以惇敘九族也儀自少時卽遍詢族人之年高德劭者或敘述名字家餘殘編或稱說世系代有口授遂一一誌之不能忘而猶慮其稍有錯訛也復參之瑩兆碑石務令有所依據積十餘年來於茲矣由是自始祖而下爲大宗爲小宗以及宗子與別子其源也其流也無不釐然秩然豈一朝一夕之故哉顧自有明以來歷年久遠莫可稽考又不敢妄爲附會以誤前人謹按我朱氏祖籍山東館陶縣學門前始祖光先公於明永樂中喬遷新樂之合河村數百年來聚族而處綿綿延延莫之或徙也在昔世德克承家聲永紹登仕籍者稱曰廉吏樂隱居者仰爲醇儒高節清風懿行碩德標諸里閭載之邑乘未可一二數非祖宗德澤培植孔厚其奚能衍弓裘之緒寔昌寔熾如是之源遠而流長耶今者戶益繁情益渙喪

葬不訃告婚娶不往來至有覲面不識其名畢世莫知其處者
又安問其支派之所由分遠近之所由判使之共相親睦乎十
四世祖斗南公十一世祖友仲公心實憂之欲詳核其前世手
訂一冊以貽子孫然而年老精衰有志未逮儀因喟然歎曰敦
宗睦族在此舉也今既不獲竟厥志仔肩雖鉅其何敢辭於是
起而紹述之詳次先世之所自而爲之譜越數載而始成帙異
日者族加繁昌人加衆盛再爲敘列斯又後人纘承之任也夫
臧氏族譜 創於嘉慶七年民國三年重修有邑人夏奠川序
李氏族譜 李氏世居臧家營爲邑望族至李秉智而益繁盛光
緒間春元法元天元創修族譜

邑人王安瀾序家之有譜所以敦一本聯九族迪前光詔後嗣
者也善乎蘇老泉之言曰同族之中相視如途人者其初兄弟

也兄弟其初一人之身也夫以一人之身散而爲數十百人之身則情渙矣故族譜之修將以萃其情也情萃則倫敘以敦族誼以睦孝弟禮讓之風油然而生於以光前徽而繼先志俾後世子子孫孫永紹弓冶勿替箕裘其在斯矣李氏自山左濟南歷城八里莊徙居鄆之臧家營嗣又徙居城內詩書教子忠厚傳家繼繼繩繩於今又六七世支派既別生齒日繁恐其久而難稽也於是閭族人共議修譜而號其譜曰務本堂夫家庭之間首重孝弟有子務本之說以孝弟爲始基子各孝其親弟各弟其長而一本敦矣九族聯矣前光可由是勉後嗣又由是詔矣然則此譜也蓋非徒別支派詳世系之謂向余所謂孝弟禮讓之風油然而生者固將於李氏見之矣若夫富貴并臻門庭光大功名淬發科第連綿今李氏雖未見諸目前而由務本之

說推之則本立道生夫固有旋至立應如操左券者此又不必
余之多贅而其理自寓者也余家鄜二百餘年與李氏爲世交
其先世皆務本其後人又靡不務本李氏之興其未艾乎

張氏族譜

世居朗公廟本新邑舊族元末張芝之裔

邑人王安瀾序余自甲午中東際戰而後由都賦歸杜門謝客
翻東壁歷史及昔賢通志家乘爲消遣計適門人張生守已執
伊族譜問序於余余曰族譜與國史不同史則宜褒者褒宜貶
者貶大筆特書所以儆權奸嘉善良也譜則溯始衍派循名覈
實族有名垂竹帛功銘旂常者筆而書之俾後世子姓慕其經
濟道德文章覽之而克繩祖武之心油然而生矣褒則有之若貶
則未也此所以篤親親也伊曰張氏係鄜南舊族上無所稽至
元順帝時有諱芝者精通經史學有淵源鄉里推荐詔爲邊吏

嗣因雨血汴梁雨毛彰德變象迭生民不堪命即掛冠辭去甘石隱焉先卜居於城東南七里許張岳寺村有塔一尊即舊居所也後遷移朗公廟村居焉修祠建室遂奉芝爲始祖他如橫渠道學敬夫事功顯而貴者安敢妄託乎余曰事貴徵實水宜溯源貧富窮達皆足以見道義溯其一脈者而傳之使長長幼幼羣相友愛同族之人不秦越視之是可矣伊唯唯而去遂纂諸譜端以昭來許云

楊氏族譜 世居東元封村譜係道光元年修民國九年重修

邑人李雲杞序蓋聞物本乎天人本乎祖尊祖故敬宗敬宗故收族昭穆序而名字晰繼繼繩綿世系於無替而能使世世子孫大一本之義聯九族之歡循流溯源無忝似續者實惟族譜是賴然則修譜顧可忽乎哉民國九年秋楊子聘三茂才出

其家譜向余而言曰渠譜自道光元年修纂經咸豐叔季兵燹之餘零落殆盡幸予尙存一冊倘不及時續修將代遠年湮殘缺滋甚不免昭穆倒置名字混淆視族人如秦越獲戾多矣予聞之喟然曰夫人生塵事擾擾務本者尠士人沈溺於帖括農夫胼胝於田間家乘一書視如弁髦今聘三提倡斯舉繼往哲而問來茲豈讎齷不識大體之流亞歟且向來修譜之資接門攤派此一役也聘三雖未克獨肩斯任而慨施鉅款彙萃成書從此敦一本聯九族子與子言孝弟與弟言悌俾人人水源木本之思油然而生將見宏農之裔方興未艾皆聘三之力也譜成索序於余余忝在姻末不敢以不文辭故畧述梗概如此

茹氏族譜 茹氏本邑世族乾隆十四年茹廷劄修族譜民國三年應聘應和耀德等續修

衛氏族譜四卷門譜一卷縉紳錄一卷乾隆五十四年十五世孫大壯輯按衛氏陝韓巨族世代簪纓自十四世衛霍遷新樂善好施扶危濟困族益大至靜瀾中丞稱貴盛焉惜此譜尙未續修

衛大壯序舊聞族叔帝佐公刻意譜牒沿村稽訪者累年始得就稿余於己酉廬次作書到韓構取至則謄作二本並摘敘門譜一本縉紳小錄一本裁訂成套爾時以世系未暇排次殊覺歉然後攜至固陵任所因潮濕間致蠹霉益不自安及移任菊潭屢欲付梓竊計帝佐叔查後業經三十餘年孫支益繁均不得及時概列新譜似更抱憾且前此之未能查確者仍不得詳前此之僅書乳名者終不能易是用中止惜余青年作客自首未歸客次又乏近支以備往來採訪致此志不克早遂思之耿耿因於丁丑五月初六日沐手謹仍照叔所查定者圖成世系

並重錄各本至七月初一日藏事它日歸田如天假之年得復至韓一爲補輯庶予之願少釋也夫

衛大壯縉紳錄序余重瞻族譜旣成因從事於縉紳錄惟余青年作客白頭未歸署中又乏吾韓近支往來以備登記卽新邑有回故鄉祭掃者限於住日無多不遑及此是以近三十年來功名事跡概行闕如不獲已仍照五十四年所錄者重抄焉且五十四年以前余回韓僅三次長遂肄業太學所謂功名事跡亦並未詳又惜余時年六十有二以眼花手顫未能工楷殊不恰志是編按門次頂序所有傳記或取諸誌書或採之國史或見於先正品評不敢妄增一字爲此者何意昭先德勸族人也何爲勸族人欲其有感而興也如徒目列上庠薦明經登鄉試捷春闈讀書能文爲政有聲將以是大厲族也則淺之乎視吾

此錄也者

趙氏族譜 明初趙江自山西洪洞遷新清初移居飲馬口卽趙庄十世珂纂修族譜民國四年九年十二世鳳詔等續修

黔南周際華序尊祖收族之誼古之成法可師者惟蘇州爲最仿而行之世不乏人大抵皆有大力者之所爲也獨怪夫天下之有大力者指不勝屈而往往忽於此事彼其心祇知厚其所生遂不暇及其所由生耳究竟薄於其先以私於其後是直示其後以薄於其先之行非惟不爲祖宗計並不爲已計與爲子孫計矣其愚孰甚吾以爲如鳴玉丈人者當世之賢者也所著居家庸言與啞道人一事余既論次之而尤喜其創建祠堂新修族譜似類於有大力者之所爲及訪其家計不過中人產耳廼能敦宗睦族勇於爲善如此此豈非豪傑之士耶人孰不有

祖宗亦孰不有族姓聞此風者可以興忽此誼者亦可以愧矣
因弁之

孟氏族譜 孟氏世居孟家營爲邑望族明太祖時孟輔由江南
鳳陽縣從征累功世襲寧山衛千戶五世至孟鎮始葬於新子孫
繁衍人才蔚起清乾隆間十四世天衢天柱序舊譜增世紀而支
派秩然民國十一年十九世家本大本等續修

孟天馥序余孟氏嶧山一派相傳隨宋南渡籍江左鳳陽縣元
末以兵散上世不可考始祖輔從明太祖自濠州起兵身經百
戰論功行賞封萬戶侯二世受世襲擢寧山衛後所掌印正千
戶官署在山西澤州之鳳臺所轄新滑兩邑各五百戶分東西
屯田沿四世墳墓在澤俱以廉明崇祀鳳邑鄉賢五世祖巡視
西屯病卒寄葬於新六世祖遂居新邑八世祖始攻儒業以軍

籍列諸生厥後書香繼世食廩餼舉明經出仕者不一凡我孟氏子孫宜懷祖德宗功毋墮家聲共勉之焉

郭氏族譜 東張門郭氏自明洪武年間遷新世業農歷五百餘年至清咸豐己未郭浦始序爲族譜邑庠生張碩虜爲之序

張氏族譜 張氏世居朗公廟至明張臻而益著後徙三岡支派頗蕃道光十七年張省三創修族譜光緒間鳳閣鳳岐光華等續修

尙氏族譜 尙氏本邑舊族相傳爲元明以來遺民七族之一舊有追遠會康熙間尙重始纂爲族譜乾隆道光光緒間璽昭廣居廣心等迭次續修

暢氏族譜 暢氏爲邑巨族四代科甲人文極盛自暢泰兆創爲族譜條例精嚴足爲模範

王氏族譜 店後營王氏爲明代宦族清初官爵更易隱於農族譜無傳嘉慶間十三世光照始續修譜民國七年十六世曰雲曰聖又續修之

王曰聖序自井田廢而學校亡宗法之壞日甚一日背井離鄉終身而不相識者無論矣年湮代遠世系而無所稽考者無論矣甚有同宗侮慢同氣推刃幾不知爲誰氏之子某房之後者此傷心宗法者所以動收族之思也收族者何修譜是也族收則宗敬宗敬則祖尊矣然譜之名不一有曰家乘有曰家牒至唐宰相世系表裴氏稱東眷中眷西眷今日家譜據隋經籍志唐藝文志也天下大矣同姓而不同宗者亦多矣冒姓通譜貽笑方家故吾譜首題曰鄺南曰店後營示別也始祖幹公書生於南京云云者重始遷不忘本也幹祖以下八世傳及修已公

修身公而爲一譜列於上方者大宗百世不遷者也自修澤公分支屬長門而以登霄公威公附之修善公分支屬二門修德公分支屬三門而以修元公修業公宗孔公宗孟公附之修民公分支屬四門者小宗五世則遷者也上世未詳者不强記承嗣無人者不强續據歐陽氏譜例孝子抱無言之恫也尊於我者稱公卑於我者不稱公今概不稱公而直書其名合族之公言非一人之私言臨文不諱也曰某支者據北齊書魏收傳文也曰元配者據晉書禮志文也曰繼配者據王介甫葛源墓志文介甫又據儀禮也書名詳字據世說註所引也有子注生幾子無子亦注名下皆歐陽氏譜例也古法不記遷徙今記之者從歐陽氏例重離鄉也古法記女之所適今不記者從蘇氏譜例也譜載塋墓者據隋書經籍志追遠也無子立孫或兩嫡並

書者禮有其變事從其實無所飾也出嗣之子仍系本生者重所生也於所後者按格復書者重爲人後也庶子不另書統於嫡也異母不分載統於父也科名封爵臣死君子死父妻死夫及有旌表者皆書於譜錄賢也入譜之歲古無正文蘇東坡年已二十老泉猶不列於譜紀姚安定以十六今亦擬以十六歲入譜據晉書十六成丁也逃入二氏者不書螟蛉抱養者不書防亂宗也自十世以下而命名舛錯者誤也因其誤而書之禮無追改也是譜也例嚴以正詞簡而盡支派分明宗法肅然譜所應有者書之譜所應無者刪之庶信今而傳後焉是爲序

程氏正宗譜 程氏係伊川後裔自何時遷新無考此譜溯自黃帝而不至百二十六世康熙四十五年修民國十年百二十九世

天榮續修

程宗孟河南程氏正宗世系序兩程伊川後第二十代嫡孫宗孟自襲職回無他可能惟以讀書爲事一日讀河南先公伊川譜從吾輩推而上之世系自先公秀而止讀新安統宗譜從秀公推而上之世系至先公元譚止讀河南程氏譜從元譚推而上之世系至先公黃帝止三譜中間雖黃帝一脈分派譜不同帙而脈不相連知者以爲譜名雖異遠宗則一不知者以爲至此而失宗也吾深以爲悞焉遂聯三合一照依舊規次第編錄自黃帝而孕生元譚自元譚而孕生秀公自秀公而孕生吾輩是上有所統此一本而統乎萬殊有吾輩而上宗秀公有秀公而上宗元譚有元譚而上宗黃帝是下有所宗此萬殊而歸於一本名爲河南程氏正宗世系是圖落成不惟一見吾程氏正派流長之盛且俾僞者不得以肆其辭焉是爲序明隆慶壬申

郭氏族譜 此爲清初漢中府知府郭永祚之裔同治九年入世

祥慶始創修族譜

郭氏家譜 郭祥瑞撰并序中定家規十條頗足爲法

田氏族譜 田氏自明永樂間由山西洪洞遷新世業農支派蕃衍無顯達者清自田印昌始九世至芸生創爲譜

田芸生本支宗譜序明永樂三年遷山西洪洞縣民實河北吾田氏自此遷於新時世亂田荒來者皆力農世世相承惟守襍穢無顯達者迄清乾隆六年處士諱印昌公入兆於城南馬家營西是爲老塋之始祖自此以下又三世無墓碣之可尋無譜牒之可紀夏殷有禮祀宋無徵能無慨乎先君子嘗謂寒族無譜貧士無儀亦自傷矣芸所知者僅自高祖始而同族繁衍散處四方皆無譜牒不急就本支而譜系之將永不知源木不知

本直與荒卉亂流等耳豈得立於人世況歷代仁厚之遺至芸而始發其蘊幸擢科名忝登仕籍使無以綿先澤之延貽後昆之緒椒聊瓜瓞更何所依據以爲典型哉茲擬自老塋始祖起爲一世中歷八世至芸先君秀嶺公爲一圖系又秀嶺公爲馬家營南新塋之始祖此下則芸兄弟六人分爲六門依次另一圖系各門又分列爲譜庶使知世次門次同條共貫一系相銜則培其枝葉以庇本根孝弟之心油然而生焉譜牒之餉遺其深且遠乎

曹氏家譜 曹氏自明永樂間由山西澤州遷新世居莊岩終明之世書香不替萬歷間宗召始創爲譜清乾隆間十五代徠松續修之

王氏族譜 聶庄舉人王蔭堂續刊家置一編

夏氏族譜 夏氏世居邑西南夏庄族頗繁盛清光緒丁酉夏奠川始爲譜

夏奠川序物本乎天人本乎祖盈天地間形形色色一天之所生也族姓蕃衍連村累社或蔓延數百里一祖所留遺也然族無譜則昭穆紊世次亂本支散佚不相顧而他族之適逼處此者或得以混雜於其間譜之所關大矣哉吾始祖光州固始人也世居西橋口小李村於前明洪武初年伏戰從軍職居十旗長大定後分屯於宋南七里營五世祖遷居茲土迄今數百餘年瓜繁瓞盛源遠流長無譜牒以紀之先人名字後昆支派散亡難追久稱憾事矣予於光緒甲午成進士籤分浙江丙申丁酉內艱旋里奉從龍公嚴命繼先曾祖延齡公志修譜丁酉孟春家居餘閒大集族衆於祠堂廣咨博訪搜殘碑採遺聞檢故牒

得延齡公族譜底藁一紙又奉從龍公手示族譜底藁一紙詳
考互訂越一歲而譜告成焉信以傳信疑以傳疑不知者闕之
疑似者存以待考不敢以恍惚難憑稍參臆斷古史例也既竣
爰付剞劂恭印數十部家存一編庶宗派明宗法正爲吾族者
雖代遠年湮身寄異鄉按譜而世系可稽非吾族者雖同田共
井越年越世按譜而親疎難淆是則延齡公之志云爾襄其成
者族長常魁家長軼羣公戰元清香祠堂董事啟元春元清仁
清雲朝選也至子子孫孫按期補敘則又有望於後世云

孟氏族譜 司馬孟氏乃明時舊族相傳自亳州遷新年代名字
無可考茲據司馬村後老塋立祖諱成府者爲始祖乾隆十八年
八世樹信創爲譜九世炳十二世天寶溫如十三世樂煊迭續修
之均有序

李氏族譜 牧野村李氏世業農無譜自民國二年國材國梁國相始創此譜

岳氏族譜 岳氏自獲邑岳家寨遷新之冀家廠係宋忠武王第五子繼忠侯遷之裔明永樂間由山西洪洞遷河北此譜猶承洪譜賡續至今源遠統長世不多有

閻氏族譜 閻氏自明洪武間由山西洪洞遷新世居閻張青舊譜遺失歷經續修民國十年秋始竣事

陳氏族譜 城南庄陳氏自序倫始歷十世支派蕃衍舊無族譜光緒間九代裕德創爲之條例世系尙屬簡明有孟汝恒序

彭氏東門族譜 臧家營彭氏前明舊族業農族譜未修始遷之年代無考東西散處遠莫可稽十二世泰昌於民國十年創爲東門族譜雖未臻美備而敬宗睦族之規基此矣

張氏族譜 世居縣東三十里張八寨明初有張八者自洪洞遷
新歷三世而支派繁衍多散處異鄉十三世興勇十五世承綸民
國十二年始創爲譜

邑人田芸生序吾新自元末兵燹後遺黎僅七族耳明初遷山
西洪洞民實河北故徙居吾新者多洪洞籍而張八寨之始祖
張八亦東遷中之一也乃獨能以名其寨不三傳而遂稱巨族
其德器必有大過人者惟世皆業農餽粥自給穠穰相承有無
懷葛天風又以支派繁衍散處者多至歷十九世而未有譜牒
之紀述以視夫詩禮名家簪纓世族祠宇丕煥族乘宣昭者誠
不可同日語矣然世德作求必有興者果能上體祖宗之心下
推一本之義思有以敦敘輯睦用立承先啟後之基則保世茲
大積久益光行見說禮敦詩簪纓輩起勿替引之豈惟藉以考

世系哉近以續修邑志每以此義勸我鄉人適張君興勇劔族
譜成請序於余既深嘉其用意之善並爲之推其本伸其義庶
共知昭明時雍之盛卽自親睦中來也將更有感慕而興起者
矣是爲序